

近代中國史料叢刊第三輯

沈雲龍 主編

唐

繼

堯

東南編譯社編

附：東大陸主人言志錄

文海出版社印行

中華民國五十六年一月臺初版

近代中國史料叢刊

第三輯

精裝十

定價新臺幣



主編者：沈

雲

龍

發行人：李

振

華

出版者：文海出版社
臺北縣永和鎮中興街99巷8號

郵政劃撥戶第二七八四號
電話九二一六五九號

印刷者：美明美術印刷廠

臺北市康定路二〇二號

經銷者：全省各大書局

版權所有

內政部登記證內版臺業字第〇八〇〇號

香

香

香

香炳麟

護國時代之唐荳廢



(一) 海軍少將 (吳)

聯治時代之唐莫廣



唐繼堯目次

第一編 革命時代

第一章 唐氏少時

第二章 留學日本

第三章 回滇練兵

第四章 光復雲南

第一編 督軍時代

第五章 率師北伐

第六章 戡定黔亂

第七章 督黔政績

第八章 二次革命

唐繼堯 目次

唐繼堯

目次

第九章

移節督滇

第二編

護國時代

第十章

討袁爲唐主動

第十一章

討袁前之籌備

第十二章

討袁時之文電

第十三章

討袁後之出師

第十四章

川粵間之血戰

第十五章

平定龍黨亂滇

第十六章

任軍務院首長

第十七章

戴黎收拾時局

第四編

靖國時代

第十八章 唐氏擁護國會

第十九章 滇省聲討復辟

第二十章 親赴川黔督師

第二十一章 滇省宣布護法

第二十二章 靖國軍之聲威

第二十三章 唐氏就總裁職

第二十四章 反對非法議和

第二十五章 實行廢督裁兵

第五編 政變時代

第二十六章 政變之遠因

第二十七章 政變之近因

第二十八章 唐離滇情形

第二十九章 粵港之歡迎

第六編 返滇時代

第三十章 返滇之動機

第三十一章 返滇之經過

第七編 建設時代

第三十二章 提倡聯省自治

第三十三章 改組省政府

第三十四章 籌辦市政

第三十五章 革新教育

第三十六章 實行新縣制

第三十七章 注重市村自治

第三十八章 整理交通

第三十九章 結論

唐繼堯

第一編 革命時代

第一章 唐氏之少時

唐繼堯。字莫慶。別號東大陸主人。雲南東川府會澤縣籍。累世均以科名顯於鄉里。父爲邑中名宿。唐氏生有異徵。襁褓時。其曾祖母撫抱懷中。偶詠古人詩句。諦聽。若有領會。稍長。穎悟異常。遇家人講古代忠孝事蹟。及岳武穆精忠報國事。輒反覆詢問。心嚮往之。六歲入塾。讀書若有宿慧。每於暇時與同校諸生戲。常倣兩軍對壘。而已爲之長。指揮擘畫。井井有條。同儕中有紛爭。必以魯仲連自任。其曾祖母嘗謂此子少異常人。長必爲吾家千里駒。故鍾愛特甚。

第二章 留學日本

唐氏年十五。應童子試。補博士弟子員。未幾。值科舉廢。清廷變法圖強。令各省選送
秀青年出洋留學。光緒甲辰年。滇中大吏屬各府申送留學生。時滇省風氣未開。
青年學子。視跋涉重洋爲畏途。多遲疑不應召。唐氏聞之。獨慨然謂人曰。乘長風破
萬里浪。男兒壯志也。何懼爲。况負笈異邦。學成救國。正吾輩今日之責。乃慷慨請往。
卽送省考試。榜發。獲中。遂派赴日留學。時滇越車尙未通。由滇赴日。須取道黔湘。經
武漢。溯長江。東下抵滬。始能搭輪赴日。

唐氏由滇起程時。擬學工業。迨抵日後。深知祖國危狀。以救國莫急於練兵。乃改學
陸軍。入振武學校。時同學二百餘人。唐年最少。畢業後入金澤第九師團砲兵聯隊。
見習期滿。進士官學校。當時革命之說初倡。各省志士。麇集東京。創設同盟會。士官
生多入會。唐氏亦爲會員。在校除究心各種軍事學外。陰與同志秘密組織陸軍團。
以革除滿清。推倒專制爲惟一目的。並創設武學社。刊行武學雜誌。提倡國人尙武。

精神。又以滇省毗連緬越。情形危迫。思以文字喚醒滇人。同起救亡。乃與滇中同志組織雲南雜誌。爲開導社會先聲。滇省革命思潮之輸入。蓋自有雲南雜誌始。

唐氏在校時。除潛心軍事學術及進行革命事業外。因見日本名將戰略。無不得力於陽明。復以餘暇研究陽明之學。常與彼邦陽明學社名人交游。窮究身心性命之學。其後日勳業。得陽明知行合一之學不鮮。同學中如蔡鏗、李烈鈞、羅佩金等。均與唐友善。時爲詩歌之唱酬。著有東大陸主人言志錄。士官學校畢業後。適日政府有搜索吾國留學生事發生。同學咸憤然思歸。蓋日人對於軍事高尙學問。嚴守秘密。不使中國學生知。留學生乃以百計暗購軍事秘密書。事發被逮。牽累者甚衆。所得書亦多散失。留學生歸國者日衆。唐氏亦於此時與滇省同學數人返國。

第三章 回滇練兵

唐氏既返國。欲順道考察日人經營朝鮮情形。乃取道仁川漢城。經東三省。沿途關

於軍事外交及政治靡不留心調查。抵津後。遂將在日所得重要軍事書。及沿途考察結果。譯刊二十餘種。乃由津旋滇。是時滇越路已通車。唐氏經過越南。對於滇越路之有關軍事各地。尤特別注意。抵滇後。任督練公所參謀處提調。兼講武堂教官。旋調十九鎮正參謀官。

當光宣之際。丁振鐸。錫良。李經羲等相繼督滇。銳意改革。創建新軍。然重要軍官。多屬北洋系分子。如靳雲鵬。曲同豐。鍾麟等。皆秉要樞。至滇籍軍官。慮其提倡革命。頗存疑忌。唐氏雖以籌備秋操之功。委爲七十四標一營管帶。然因對兵士闡發民族主義。爲忌者中傷。遂解兵柄。調任講武堂監督。唐氏以從教育入手。計亦良得。除教授學術外。仍以革命宗旨灌輸於學生。講武學校爲滇省中下級軍官之出產地。十餘年來。出身該校之學生。爲擁護民國捍衛桑梓死難者。不下數千人。滇軍今日之所以焜耀中外。滇武校之聲譽昭著。不亞於日本之士官保定之軍官學校者。實基

於唐氏長該校時之積極培育整理所致焉。

第四章 光復雲南

滇省當滿清末季。國政不綱。外患內憂。時相倚伏。有識者知非推翻專制政體。不足以救亡。兼之本省留學生回滇。復日以民族思潮。灌輸滇人。故青年學子。及軍界中人。咸蓄發難改革決心。士官同學之在滇。緝軍符者。唐氏外。如蔡鏗。謝汝翼。李根源。黃毓英。羅佩金。沈汪度等。平時卽以革命運動部下。秘密團結。以待時機。及辛亥武昌首義。全國震動。唐氏知滿運將終。乃密集同志。謀滇省響應。遂有辛亥九月九日滇軍反正之舉。

在舉義之前數日。各軍官累在唐氏私宅及講武學校等處秘密會議。籌商進行。初擬陰歷九月初一日舉義。會同志中有倡言滇鄰英法。恐起兵發難。外人藉口保護僑民。進兵干涉。或反貽禍。不如俟響應省份較多。成功較易。唐氏獨不以爲然。謂滿

清末運將終。吾儕亟宜毅然決然。誓師響應。光復祖國。成敗利鈍。非所宜計。若徘徊瞻顧。趨利避危。非志士所應爲。且滇距虜廷窈遠。北方兵力難達。滇師速起。反可促西南諸省獨立。然後聯合北伐。援應中部各省。則直搗燕雲。飲馬蘆溝。一舉而雪數百年之國恥。實意中事。衆大動容。乃插血同盟。秘密佈置。決定九月九日重陽節起義。以蔡鐸方練兵巫家壩。任第三十七協協統。羣推爲臨時總指揮。擔任進攻省城之責。

當舉義前天久陰雨。獨至是日。則翳霧皆空。煥然晴霽。且有景星慶雲出現。滇人咸以爲異。唐蔡等秘密計畫時。以省城最重要者爲總督署及軍械局。遂分兵兩路。蔡鐸及謝汝翼等率步兵由巫家壩大營入城。攻取軍械局。唐氏及庾恩賜劉祖武李根源等率砲兵由北較場大營入城。直撲總督署。沈汪度則率講武學校學生開城接應。先數日省城風鶴頻驚。謠誑日甚。清大吏雖微有所聞。然恃新軍爲腹心。尙不

爲意。不知是時七十三四標新軍。均爲唐蔡等運動成熟。舉兵之夜。唐氏以大砲射擊督署。擊毀署內房屋數十處。死傷督署衛隊數十人。擒斬兵備處總辦某及輜重營某管帶黎明。遂克督署。清督李經羲先已棄職潛逃。各司道大半被拘禁。藩台世^增某因屬旗籍。爲亂兵所殺。督署衛隊千餘人。完全投誠。乃派兵助攻軍械局。克之。省城大定。北洋軍官靳雲鵬鍾麟^同等。或逃或被殺。是日下午。各軍官會議。組織軍都督府於五華山。舉蔡鐸爲都督。唐氏副之。唐力辭。都督府下設軍政軍務參謀三部。唐氏任軍政參謀兩部次長。仍兼講武學校總辦。籌畫軍事教育。滇省之獨立也。舉一晝夜之力。遂將滿清三百年根深蒂固之基業推翻。秩序之安定。爲各省所僅見。皆唐氏及蔡李等事前籌畫週密。佈置井然所致。滇人至今猶盛稱之。

省垣既定。各縣亦相繼克復。惟迤西尙有亂事。蔡鐸乃命李根源率師西上安撫。未幾迤南之蒙自縣兵變。擾及滇越路。法人欲藉口護路進兵。時唐氏因籌備軍事教

育。收集省垣陸軍小學校體育學生及講武學生。開辦陸軍幹部學校。造就下級軍官人才。方自任校長。聞之。卽以所部幹部學校學生駐紮沿鐵路。任護路之責。全路安謐。法人進兵之議始寢。否則滇省當獨立之始。外患相逼。影響時局至鉅也。

第二編 督軍時代

第五章 率師北伐

武昌革命軍發難後。未逾月。而長江各省相繼響應。臨時政府成立於南京。清庭大懼。向民軍乞和。擬遁走滿州。民國基礎已固。及袁世凱出任內閣。派馮國璋率師南下。攻克漢陽。同時吳祿貞被刺於石家莊。太原潼關相繼告警。大勢岌岌可危。獨立各省。乃議組聯軍。大舉北伐。滇省亦開軍事會議。討論出兵。先是民軍發難。雖起因於川路風潮。然川省自趙爾豐被殺後。亂事日熾。川人聞滇獨立。派代表來乞師。滇當局以川滇唇齒。救災卹鄰。義無可辭。曾派張子貞爲司令。率兵三梯團援川。擬俟

川局底定。卽會合川軍出師武漢。爲民軍應援。至是以大局阽危。援川滇軍入鄂。緩不濟急。乃謀另組北伐軍往援。議決以唐氏爲滇省北伐軍總司令。率三千餘人。取道永寧瀘州。會合援川滇軍。由重慶出秦晉。以趨燕雲。唐氏遂率所部健兒。於民國元年正月某日。由滇省出發。

第六章 戡定黔亂

滇川獨。後黔省亦發難響應。惟哥老會匪之勢甚熾。當舉義時。發難者多利用之。以推翻清吏。故光復後。匪黨遂盤據要津。無惡不作。都督楊蓋誠治黔無狀。爲黔民所反對。且日覩會匪猖獗。無力制裁。遂藉口援鄂。率部離黔。匪首趙德全乘間自爲都督。縱其黨羽蹂躪地方。黔中士紳不堪其虐。乃組織耆老會。密派代表戴戡周沆等來滇乞師。滇政府以黔患不平。滇難安枕。允以北伐軍道出貴陽。代平黔亂。然後相機進行。或由遵義出重慶。會合援川滇軍東下夔巫。以入武漢。或沿銅仁入湘西。

由施鶴以趨襄樊。議既定。致電唐氏。令改道援黔。

唐氏率滇軍正月自滇出發。二月抵貴陽。黔各界聞滇軍至。遂派代表歡迎犒師。歷陳匪類怪現狀三十餘條。三月一日。黔紳民宣布趙德全罪狀。迫令辭職。請求滇軍入城鎮撫。是時匪黨尙盤據城內。唐氏乃將所部分駐城外形勝之地。函告趙。衆怒難犯。勸令解職。願爲保全。趙置不答。并密約匪黨抵抗滇軍。燒擄省城。爲先發制人計。經滇軍探悉。於黎明嚴隊入城。分擊都督府火藥局執法部等處。均得手。商民爭以餽酒餉軍。酬錢不受。城外南廠黔靈山頭橋。均匪黨駐紮要地。亦爲滇軍攻破。斃匪多人。生擒無算。趙及其黨羽均逃。匪軍投誠繳械。亂事遂平。黔局既定。黔人感唐氏戡定禍亂。出民水火之功。乃挽留滇軍鎮攝。並議改組軍政府。推唐氏任臨時都督。唐以出師本旨。首在北伐。順道援黔。乃救災卹鄰權宜之計。惡容半途中止。至擔任黔中要職。尤非此來本意。辭之至再。黔人以是時省垣雖定。各縣匪風尙熾。慮滇

軍一去。將再遭匪黨塗毒。因堅留唐氏。唐氏辭不獲已。乃允暫任維持一月。令黔人速謀善後。並與黔人約。如西蜀與滇有意外變故。應辭職赴援。一面電告滇當局。得同意。遂在黔組織機關。恢復秩序。派兵赴各屬清鄉緝匪。以安閭閻。甫一月而南北統一告成。各省北伐軍一律中止前進。唐氏欲踐前言。還政黔人。不意黔議會及各界感唐氏維持之功。已電請中央政府正式任命唐氏爲貴州都督。特授勳二位。補官陸軍中將。加上將銜。唐氏遂留黔。組織都督府。籌畫一切善後事宜。是時黔省哥老會匪之勢蔓延全省。趙德全既失敗。遂往各縣煽惑匪黨起事。未幾而陳匪開釗據銅仁叛。黎平古州威寧正安遵義各屬匪亂繼起。下游一帶烽火不靖。唐氏扼腕歎曰。黔民以生命託予。惟予力是賴。今不能保境安民。其何以謝黔人。遂籌畫軍事。指授機宜。三月陳開釗遁。越兩月黎平古州威寧均克復。至九月遵義亂亦平。全省秩序大定。黔民方慶更生。不意陳開釗率殘部入湘西。復煽惑楊蓋誠。

部回黔。於是黔省仍陷於危。

先是黔前都督楊蓋誠被匪黨所逐。藉北伐離黔。及南北統一。楊部駐湘西洪辰一帶。進退維谷。頗二回黔擾亂。黔人以楊氏在黔時。曾縱容匪黨。廣開公口。以致哥匪盤據全省。地方受禍甚深。聞楊部將返黔。靡不驚憤。卽通電拒楊。請唐氏服從民意。勿萌退志。是時湘鄂當局亦因楊氏招匪禍湘。亟宜謀解決辦法。乃由中央任命黔旅長周燊儒接統楊軍。與黔當局籌商回黔辦法。唐氏及黔議會均派代表接洽。歡迎周率部返黔。不意陳開釗席正銘等由黔人湘。乘機煽動該軍。擁席爲總司令。不受各方調停之命。迨周回黔。席陳等遂率黔軍一部。勾結湘境流亡。及黔邊諸苗。號稱數萬人。攻陷松桃江口。進圍銅仁。黔局幾糜爛。

當楊部不受調停。開拔回黔時。唐氏憤甚。決辭職率部回滇。時黔人以滇軍代平黔亂。地方粗安。若一日回滇。匪軍入黔。受禍必深。乃召集各界在省議會開會。議挽留。

唐氏到者數萬人。有至於泣下者。遂上書請願留唐。並派本省陸軍赴銅仁拒絕楊席。一面通電宣布楊席罪狀。唐氏見民意傾向。乃決留黔。籌畫軍事。時滇軍在黔者。全部僅二千餘人。守銅仁者不滿千。敵登城與之血肉相搏。鉅戰七晝夜。卒大破敵兵。當下游震動時。全黔驚惶。唐氏坐鎮省垣。從容調度。分兵策應。月餘。卒平鉅亂。從此夜郎雄嶺。牂牁大江。芘草蠻花。舉莫不知唐氏威名矣。

第七章 督黔政績

黔亂既平。唐氏遂銳意整理政務。都督府下設軍務政務參謀參議四處。軍務處綜理全省軍事。以黔中原有巡防隊及防營綠營。內容腐敗。不堪作戰。乃籌備改練新軍。並整頓防務及民團各局。專任清鄉緝匪。政務處綜理全省行政事務。其下設民政財政實業各司。參謀處爲軍諮機關。掌理軍務上一切計畫。並籌辦講武學校。造就新軍下級軍官人才。參議處延聘黔省耆宿。參議軍民政務。用合議制行其職權。

男設參贊秘書副官。以爲補助機關。又以軍紀關係重要。特設衛戍司令部。其下設經理局軍警局。以整飭軍紀。保持公安。部署既定。秩序井然。

唐氏對於吏治。特別注重。以爲欲謀地方之久安。須得賢良之牧令。而吏治之混弊。由於官方之不整。乃從慎揀知事人才入手。明定資格。舉行甄錄。考言詢事。以觀人才。黔省吏治。乃稍清明。此外關於教育實業煙禁諸端。皆積極進行。黔省當匪亂之際。人民懼禍。多掛名公口。（卽入會匪黨內）藉圖自全。故當時有匪國之號。唐氏除取締公口外。並告誡人民。許以自新。概不株連。攻訐繹騷之禍。賴以不作。黔省財政素絀。未光復前。賴各省協餉維持。滇軍駐黔後。餉糈尤絀。唐氏慮增重黔人負擔。乃商之滇當局。仍由滇解餉接濟滇軍。故黔人尤德之。

唐氏督黔兩載。至癸丑十月。滇督蔡鍔解職赴京。中央以唐氏鄉望素孚。乃調任爲滇督。去黔之時。黔父老送至數十里外。後追念唐氏在黔政績。爲之建生祠。立督黔

紀功碑。民四以後。唐氏興護國護法之師。黔省均與滇一致行動。雖由滇黔地理關係使然。而唐氏督黔時之遺愛。亦足以動黔人也。黔人代唐氏建立之紀功碑原文云。

在昔江衡如砥。硯山留墮淚之碑。歌鼓相聞。之水有表忠之觀。陶公望重。攀柳長懷。召伯化行。芳棠載詠。蓋熙和敏利。公德之入人者深。斯仰澤懷風。聲聞之流傳者遠。是雖星霜易世。猶傳德頌之詞。人民已非。尙有奉嘗之慕。况乃攀轅臥轍。使君之檠戟非遙。蹈德詠仁。父老之謳思正切。決西江之水。如挹恩波。摩紅巖之碑。難銘勳烈者哉。此黔人於我都督唐公援黔之功。所由紀也。溯自鄂州首義。海宇從風。三百年胡運告終。廿三省軍民響應。於是三戶豪傑。並起亡秦。六詔健兒。大呼袒漢。聽鷓鴣聲於蜀道。已是屠伯命盡之時。記風土於桂林。又當義師反正之日。黔雖下邑。敢昧先幾。詢謀僉同。衆擎並舉。師尹赫赫。奉璽綬以相從。生徒莘莘。執

干戈以入衛。將謂盪瑕滌穢。日月重光。後舞前歌。太平有象矣。顧乃羣兒相貴。妄貪天功。豎子無謀。竟敗乃事。楊僕射尸居餘氣。空登上將之壇。黃將軍跋扈飛揚。自上衝天之號。揭竿斬木。無非綠林之雄。尺籍五符。盡是烏合之衆。如蛾賊盛並起者。何止三十六方。點將錄成同惡者。奚啻一百八輩。千里之沙蟲欲化。十室九空。一日之風鶴數驚。連城盡閉。瞰豺狼於當道。哀哀無告之民。縱虎豹於九關。慘慘偕亡之勢。耗矣悲哉。嘻其酷矣。維時我公。方悉南中之甲。爲北伐之謀。乃移西嚮之師。急東鄰之難。軫秦庭之哭。氣已吞吳。收鄴壁之軍。義惟救趙。望風而百城悉定。爭壺漿箠食以相迎。摩壘而一軍皆驚。笑霸上轅門之兒戲。而且師道函首。已不戢而自焚。希烈無親。乃濟惡而反善。始忌醫以諱疾。曾無東道之儀。更樂禍而忘憂。竟弛北門之管。爾乃鳴地中之鼓角。孝長則蒙被以驚。張夜半之旌麾。子通則燒營而遁。壽春老幼。歌唱以出重圍。三輔耆民。歡呼而夾衢路。義聲所播。咸

慶更生。檄草遙傳。有如望歲。翦銅江之鯨浪。擢千萬衆捍賊之風。掃威水之蠻烟。剗數百年逆酋之毒。然後蒼蒼雲嶺。遙分金碧之輝。莽莽黔江。重煥雲霓之色矣。維公神明玉映。威重山崇。有家視四海之心。具雄入九軍之氣。其克敵也。有如撥麴。其去惡也。有如拔薤。其惠民也。有元酒甘脯之思。其趨士也。有倒屣虛衿之雅。數中興方伯。未有荀郎少年。問荊州吏民。共說長孫清德。豈非威騰閩外。禮禱區中者歟。尤足紀者。海水來宗之日。忽軒動地之波。風雲乍定之時。更嘘彌天之霧。則有襄樣節度。相背王孫。敢冒共和之名。妄稱靖難之役。山頭蘇峻。蠢爾鴟張。井底子揚。居然蛙怒。誇南朝之天塹。鐵鎖連江。翊新府之地靈。龍光射斗。鼇愁地陷。悲浩劫於東南。鳶站風高。斷浮雲於西北。公赫斯怒。我武維揚。痛黔首之無辜。懼黃靈之其餒。乃聯秦晉之好。同揮反日之戈。更發吳楚之謀。獨標疾風之節。卒能區分黑白。局定蒼黃。迥西指之義旗。作南天之砥柱。洞庭波冷。潛消沸海之聲。下

至歌殘更奏陽春之曲。此又志安社稷。義薄雲天。名與嵩嶽爭高。功在生民不朽者矣。今者河山再造。鐘簴無驚。東西之鸚鵡偕來。南北之車書一統。大總統歌大風而思猛士。命還公以本州。感零雨而念勞人。許移師於錦里。然而蘇我撫我。四境之詠歎如聞。歌斯哭斯。十萬之人家無恙。悵繫維之無術。甯忘生死骨肉之恩。感衽席之同登。宜有存德念功之禮。爰伐穹窿之石。聊陳邱山之功。作清忠之生祠。紀疆理之殊績。試望昆明帶水。恍瞻在眼之旌旗。請看光復重樓。定勝圖形於臺閣。

第八章 二次革命

民國二年。唐氏任黔督時。值癸丑二次革命發生。唐對於袁世凱之專橫誅鋤異己。久已不滿。大借款發生。曾通電反對。主張由各省趕辦民國公債。以免飲鳩止渴。及條約簽訂。不可挽回時。復通電要求用於正途。並請將京內各機關行政費用宣布。

以釋羣疑。迨贛宵戰禍爆發。各省紛謀響應。川軍第五師長兼重慶鎮守使熊克武。亦在渝舉兵討袁。唐氏是時。遂與滇督蔡鍔。密議組織聯軍。爲長江各省應援。當熊據渝獨立時。袁世凱曾令唐氏爲滇黔聯軍總司令。使派兵入川擊熊。藉以窺黔省態度。唐乃商之蔡督。擬令滇軍赴川。結合川軍。順流東下。出夔萬趨武漢。爲東南各省討袁軍後援。議既定。滇派謝汝翼。劉雲峯。取道瀘州。黔派葉荃黃毓成。率師入川。因滇川黔交通不便。行軍遲緩。葉黃尙未抵川境。獨立各省。已烟銷霧滅。曇花一現。熊克武亦爲袁軍擊潰。離渝。唐氏見袁勢方張。大事已去。不得不暫終止進行。保存實力。以待時機。然滇督蔡鍔。竟因此爲袁氏所忌。調之入京矣。

第九章 移節督滇

民國二年十月。唐氏由黔移節督滇。是時蔡鍔甫去。野心者擬乘此攫取政權。遂有十二月楊春魁據大理之叛變。楊春魁者。辛亥革命時之下級軍官。因案被撤差。遂

煽惑駐榆一部分兵士謀亂。榆城爲滇西要衝。是時唐氏蒞滇未久。政局尙未安定。故民心惶惑。形勢岌岌。幸唐氏處置有方。派兵勦撫。未逾月而亂平。地方秩序全復。翌年四月。迤南臨安府復有張祿勾結駐軍叛變。唐氏指揮若定。數日而戡平。自此之後。唐氏恩威遠播。滇省內部。遂安如磐石。

袁氏自劇平二次革命。驕橫日甚。不軌之謀。亦漸萌。首則改變民國官制。藉提倡軍民分治。實行北洋系駐防政策。各省都督。均易名爲將軍。半以北洋系將領任之。另設巡按使綜理民政。實則仰武人鼻息。滇省地處邊隅。北系暴力遠不能及。袁氏乃任唐氏爲開武將軍兼雲南巡按使。未幾復以黔人任可澄任巡按使。令唐氏專督理軍務。其實欲藉任氏監視唐之行動焉。

唐在兼巡按使任內時。對於實業教育內務諸要政。整理不餘遺力。尤注意於籌畫人民生計。維持社會道德。並親赴各屬巡閱。除蒐簡軍實安輯邊防外。對於地方疾

苦吏治良窳。在在考察注意。後專理軍務。遂竭全力於整軍經武。因見袁氏專制跋扈。知時局必釀鉅變。乃籌備軍事。爲未雨綢繆計。時袁氏派心腹駐各省。隨時探報。對中央舉動。唐氏乃藉口滇毗強鄰。邊防重要。非練兵不足以禦外。非練將不足以強兵。故袁氏坦然相信不疑。唐氏對於養成軍官人才。甚爲注意。嘗謂軍隊尙可臨時添募。將領則非平日造就不可。故於講武學校。汲汲擴充。增加班次。並親任教務。又設將校講習會。凡各旅團營長官。均令人會。教以道德要旨。法制概要。名將事略等書。此外又印刷理學各書。分授各將校自習。並於每星期日。召集各將校親授以王學綱要。暨孫吳兵法。及軍事各學。且集合軍官時。輒訓以中國內憂外患。禍至無日。保衛國家之責。端賴軍人。聞者無不憤發。平居常語人曰。日下時局雖粗安。而亂機四伏。有觸卽發。苟不修軍政於暇時。則臨事鮮有不掣肘者。其先事預防類若此。其後護國之役。滇省以一隅之地。能與袁氏暴力抗衡數月。苟非唐氏事前預爲布

置。儲有實力。則斷無成功之望也。

第三編 護國時代

第十章 討袁爲雲南主動

丙辰滇省興師護國。主動者實唐氏。觀於事前之籌備。臨事之佈置。即可知之。其效命疆場。血戰川南。累殲袁氏軍隊。使川粵震動。黔桂響應者。則滇軍將士之功。若蔡鐸。則以反對帝制來滇贊助。適逢其會。克享盛名耳。謂蔡氏爲護國討袁之一份子。則可。謂護國之師起於蔡氏。則不惟湮沒唐氏之勳業。且抹殺滇軍之戰績。非主張公道者所宜云。乃蔡之師梁啓超輩。欲貪天功爲己有。竟謂討袁爲蔡氏一人主動。國人因蔡氏曾率師入川。亦誤信之。此則遠失真象。茲編所述。在使閱者深悉滇景。當時護國討袁之經過也。

方二次革命告終。袁氏蹂躪國會。解散議員。變更約法時。唐氏卽慨然謂僚屬曰。觀

袁氏近日所爲。司馬昭之心。路人皆知。設有違背約法。變更國體。當與國人共除之。蓋唐氏斯時。已深知袁氏必有異謀。而決心以討之。故在滇省整軍經武。購械練兵。以爲發難之預備。

籌安會發生。君憲救國之議。囂然塵上。未幾。請願勸進。稱帝改元之耗繼至。唐氏見輿論反對。以討袁時機已屆。決心伸大義於天下。乃積極爲軍事之籌備。並以討袁事業。關係全局。非集合海內英俊。共同努力不可。遂先期分派代表。密赴各省接洽。是時袁氏勢力。方佈全國。密探遍駐。消息靈通。滇以一隅而抗全局。無異螳臂當車。稍有疏虞。事未舉而禍立至。故唐氏表面。仍示鎮靜。赴川之師。雖早出發。惟當獨立未宣布前。各方幾無所聞。其舉動縝密可知。其所以成功。蓋亦在此也。

滇省聯絡之使既出。適蔡鍔亦反對帝制出京。唐蔡事前。雖各進行。實未相謀。至是唐以蔡氏宗旨既同。且曾爲滇中舊帥。威望久著。得其來滇贊助。足以振義軍士氣。

而寒敵胆。乃密電滇代表探詢蔡氏出京後行蹤。迎之入滇。時袁探遍駐粵滇蔡氏甫抵港。統率辦事處已密電唐氏。令獲蔡正法。唐慮中途有變。派其弟繼虞藉調查自來水名義。赴海防迎蔡晉省。及抵阿迷。袁果令阿迷縣知事張一鯤暗殺蔡氏。以護衛嚴得免。蔡於十二月十八日抵滇。時唐氏先期派人川之滇軍兩支隊已抵川邊。滇川相距二十餘日。如滇軍護國爲蔡氏主動。則必俟蔡抵滇始能出師。且袁氏已授唐氏一等侯爵。是時滇省內部一致擁唐。唐氏果無主動討袁之意。固已拜受侯封。而拒蔡入滇。奚必以全省爲孤注之擲。護國之師。始終出唐氏自動。於此固可證明矣。

第十一章 討袁前之籌備

先是唐氏督滇時。知袁氏野心日熾。必有不利用於民國之舉。遂於整軍經武之暇。勉僚屬曰。吾滇地險民強。可資戰守。若取三迤子弟而施以軍事教育。勗以國家大義。

將來國中有變。奠定神州者。必當世所不注意之雲南也。迨籌安會發生。段芝貴等之通電至。皆承袁意旨。鼓吹帝制者。唐氏顧謂左右曰。前言殆不幸而中矣。雖然。吾誓不與此叛國者共戴一天。於是表面虛與委蛇。密召軍界中堅人物於混成團本部宣示曰。袁氏不安於總統之位。早已見諸形迹。今楊度等公然設籌安會。大倡君憲救國論。其中發縱指示。大有人在。在民國爲先烈及吾輩以無量數鐵血換來。一旦爲彼獨夫奪而私有。天下從此無安甯之日。吾儕既爲民國官吏。當與天下英雄戮此國賊。諸君其有意乎。各軍官皆慷慨願聽命。唐氏乃與各軍官約三事。(一)積極提倡部下愛國精神。(二)整理武裝準備作戰。(三)嚴守秘密。當時不過使部下知所趨向。先事籌備。時民國四年九月十一日。是爲雲南首義前之第一次會議。未幾。籌安會之勢力日漲。十九省贊成君憲之僞電至滇。唐氏乃於十月七日召集第二次會議。訓曰。袁氏盜國。已成事實。吾輩衛國天職。各界信服。若不亟起圖維。不

惟外無以對國民。即內亦無以對良心。聞者感動。因決定起義時機。(一)中部各省中。有一省可望響應時。(二)黔桂川三省中。有一省可望響應時。(三)海外僑民或民黨接濟餉糈時。(四)如以上三項時機均歸無效。則本省爲爭國民人格計。亦祇注一擲。宣告獨立。蓋至是而雲南討袁之事。已完全決定矣。是爲首義前之第二次會議。

是時海外民黨及各省志士。因見袁氏盜國。紛紛歸國。密謀舉事。唐氏以滇省既與師護國。宜與各方聯絡進行。乃分派代表。赴蘇浙川粵桂湘及南洋等處。協商一切。適袁氏派來滇運動各界贊成帝制之私黨。偵得唐氏態度。密電袁氏。請先事預防。一面復陰謀煽惑滇軍內部破壞義舉。唐氏知之。密召兩次與會諸人。謂曰。袁氏盜國。天人共憤。本省舉義佈置。近亦大有頭緒。但茲舉關係重大。於未發表以前。內雖有積極進行之準備。外仍須示消極鎮靜之態度。並須嚴防奸細。煽惑軍心。庶不至

有疏虞。衆唯唯奉命。時十一月三日事也。是爲首義前之第三次會議。

北京大典籌備處。通告參政院彙齊全國國體投票。全數主張君主。並推戴袁氏爲帝之電至滇。唐氏謂僚屬曰。是烏可騙人者。吾有彼偽造民意之電。皆盜國之鐵證也。將宣布中外。彼雖狡獪。亦無從置辯。於是遂積極籌備餉械。以備獨立。又以四川爲出師要道。因命鄧泰中楊綦率兩支隊先後向川邊出發。蓋蔡鐸尙未至滇。滇軍早已下動員令開拔赴川矣。

十二月十八日。蔡鐸李烈鈞等相繼至滇。唐氏乃於十九日邀集省內外要人會議於其私宅。到者爲蔡鐸李烈鈞方聲濤熊克武戴戡籍忠寅龔振鵬但懋辛王伯羣。任可澄及本省軍政界要人數十人。唐氏宣言曰。袁氏盜國之野心。已不自今日始。今則叛逆昭著。國命垂危。苟聽其所爲。不惟無以慰締造民國諸先烈之陰靈。行且亡吾國。滅吾種。陷吾神州大陸於萬劫不復之境。此堯所以有申罪致討之決心。今

幸天佑中國。各處同志咸謀響應。催促起義。事機已熟。四方豪傑。翩然來助。拯此殘生之民國。而使之不爲元惡謀殺者。胥於是乎攸賴。頃梁公啓超來電。謂外交緊急。袁將賣國。請卽發動。是宣布舉義日期。不可再緩。在會諸人。相繼發言。結果議定以唐及巡按使任可澄名義。先電袁氏。令其取消帝制。殺楊度等十三人。以謝天下。限二十四小時答覆。如屆時無答覆。或答覆無圓滿結果。卽以武力求最後之解決。隨議組織臨時政府及各種軍事計畫。時十二月二十一日也。是爲首義前之第四次會議。

次夜十句鐘。唐氏復召集來滇諸同志。及本省外校以上軍官。及各機關長官。在將軍署會議。到者蔡鍔李烈鈞等三十八人。舉行宣誓。插血爲盟。衆三呼萬歲而散。是爲首義前之第五次會議。次日唐氏召集本省各界。演說起義情形。人心大悅。及二十五日限滿。袁無電答覆。唐氏遂通告宣布雲南獨立。茲將唐氏首義時警告袁氏

取消帝制原電錄後

北京大總統鈞鑒。華密。自國體問題發生。羣情惶駭。重以列強干涉。民氣益復騷然。僉謂誰實召戎。致此奇辱。外侮之襲。責有所歸。乃聞頃猶籌備大典。日不暇給。內拂輿情。外貽口實。禍機所醞。良可寒心。竊惟我大總統兩次即位宣誓。皆言恪遵約法。擁護共和。皇天后土。實聞斯言。億兆銘心。萬邦傾耳。記曰。與國人交。止於信。又曰。民無信不立。食言背誓。何以御民。綱紀不張。本實先撥。以此圖治。非所敢聞。自停止國會。改正約法以來。大權集於一人。凡百設施。無不如意。憑藉此勢。以改良政治。鞏固國基。草偃風從。何懼不給。有何不得已。而必冒犯叛逆之罪。以圖變更國體。比者代表議決。吏民勸進。擁戴之誠。雖若一致。然利誘威迫。非出本心。作僞心勞。昭然共見。故全國人民。腐心切齒。皆謂變更國體之原動力。實發自京師。其首禍之人。皆大總統之股肱心膂。蓋楊度等所倡之籌安會。煽動於前。而段

芝貴等所發各省之通電促成於繼。大總統知而不罪。民惑實滋。查三年十一月二十四日申令有云。民主共和。載在約法。邪說惑衆。厥有常刑。嗣後如有造作謬言。紊亂國憲。卽照內亂罪從嚴懲辦等語。楊度等之公然集會。朱啓鈴等之秘密電商。皆爲內亂重要罪犯。證據鑿然。應請大總統查照前項申令。立將楊度孫毓筠嚴復劉師培李燮和胡瑛段芝貴朱啓鈴周自齊梁士詒張鎮芳袁乃寬等。卽日明正典刑。以謝天下。渙發明誓擁護共和。則大總統愛國守法之誠。庶可爲中外所信。而民怨可稍塞。國本可稍定矣。繼堯等夙承愛待。忝列司存。旣懷同舟共濟之誠。復念愛人以德之義。用敢披瀝肝膽。敬效忠告。伏望我大總統改過不吝。轉危爲安。民國前途。實爲幸甚。再者。此間軍民痛憤久積。非得有中央永除帝制之實據。萬難鎮勸。以上所請。乞於二十五日上午十點鐘以前賜答。臨電零涕。不知所云。謹率三軍。翹企待命。

第十二章 討袁時之文電

唐氏首義護國後。關於對內對外宣布討袁之文電甚多。本書以限於篇幅。不克備載。茲錄唐氏討袁之兩檄文。及護國軍誓師詞。致全國疆吏。及在外滇籍軍官。勸同申義憤。擁護共和。二電於後。

▲唐繼堯討袁檄文 十萬火急。各省上將軍。巡按使。護軍使。各都統。並轉各軍師旅長。各道尹。各知事。各商會。農會。教育會。各學校。各報館。公鑒。嗚呼。天禍中國。實生妖孽。袁氏以子孫帝王之思。致億兆生靈之禍。怙終不反。復諫無親。既自絕於國民。義不同其履戴。敢聲其罪。與衆討之。袁氏昔在清廷。久竊權位。不學無術。跋扈飛揚。兇德既已彰聞。朝端爲之側目。迨民軍首義之日。及清廷遜位之時。袁氏兩端首鼠。百計媚狐。以孤兒寡婦爲大可欺。以天災人言爲不足畏。跡其侮弄神器。睥睨君親。固已路人知司馬之心。識者有沐猴之嘆。惟時我邦人諸友。念風雨之漂搖。懼民生

之塗炭。永懷國難。力奠邦基。故贛甯之役無功。而皖粵之師亦挫。乃袁氏恃其武力。遽卽驕盈。蹂躪人權。弁髦法治。國會加以解散。自治橫被摧殘。異己削迹於國中。大權獨操於一手。彼固曰是可以有爲矣。卒之無補時艱。不保中立。濟南自拓夫戰域。遼東復展其租期。甚至俯首爲城下之盟。被髮有陸沉之痛。嗚呼。我國民之忍辱含垢。爲己甚矣。袁氏之力圖瀚雪。以求報稱。宜何如者。何圖異想忽開。野心愈肆。元首謀逆。帝制自爲。籌安會發生於前。請願團繼起於後。等哀章之金匱。假疆華之赤符。對內國人民。則謂外議之一致。於外交方面。復假民意以相欺。自奮獨夫之私。欲掩天下之目。嗚呼。永除專制。夫已氏之口血未乾。難拂民心。前清帝之詔書具在。無信不立。甯得謂人食言而肥。何以爲國。因之外侮自召。警告頻來。干涉之形旣成。保護之局將定。此時楊再思一日天子。甯復有人間羞惡之心。他日石敬瑭半壁山河。詎更有吾民視息之所。興言及此。哀痛何云。夫總統一國之元首。中外所具瞻也。今袁

氏躬爲叛逆。自失元首之資格。斯其醜行涼德。固有無能爲諱者。更舉其略。以告國人。南北和議初成。黨人歡迎南下。袁氏欲留無辭。乃煽動兵變。以爲口實。京津一帶。慘付劫燒。張家口兵變。首亂不過數人。而全軍咸遭坑殺。逞一己之淫威。輕萬衆之生命。是爲不仁。黎副總統一代元勳。功在民國。段陸軍總長當世人傑。志尤忠純。皆袁氏股肱心膂也。徒以反對帝制之故。積被猜疑。瀛台等羑里之囚。西山有雲夢之辱。近傳惡耗。未卜存亡。歎烏啄之凶殘。悲烏弓之俱盡。是謂不義。梁士詒段芝貴張鎮芳袁乃寬楊度胡瑛顧鼈輩。皆市井小人。頑鈍無恥。袁氏利其奔走。任以鷹犬之材。梁等遂竊威權。肆其狼狽之技。羣邪並進。一指當前。望夷之禍。匪遙。輪台之悔。何及。是謂不智。當和議初起。袁氏握清廷全權。每語人曰。吾誓不作總統。及叛跡已露。中外咸知。袁氏猶曰。公等若再以帝制相迫。則我必逃英倫。言猶在耳。今竟何如。是謂不信。辛壬之際。義旅同興。爭冒死以圖功。更舉國已相授。袁氏之有今日。伊誰之

力。乃動矜謙讓。橫肆誅夷。謂不殺于謙。則此舉無名。謂苟無曹瞞。則幾人稱帝。功反爲罪。生者之身已寃。死而有知。地下之目豈瞑。是謂不讓。又謂財權集於內府。計部徒建空名。大借款以鹽稅抵押。用途始終秘密。長蘆運鹽公司獨占。商利壟斷。聞亦同登。袁乃寬。梁士詒。張鎮芳。袁氏之聚斂臣也。交通銀行。袁氏之外府也。甚至一國之元首。而寄私產於他邦。騰笑外人。貽羞當世。其寡廉鮮恥。有如斯者。尤可異者。顯違親訓。陌視孔懷。乖戾已深。本實先撥。宮門喋血。患已伏於隱微。斗尺尋仇。禍恐烈於典午。彼宗且覆。吾國何存。哀我無告之人民。忍隨昏暴而俱盡哉。昔者董逃未唱。關東州郡同盟。莽竊初成。兩河義軍並起。今袁氏之罪。更浮於二兇。民國之危。尤甚於季漢。而且孫皓與下多忌。祖約褊阨不仁。孟津之八百不期。牧野之三千愈奮。斯時也。各省軍民長官。身爲共和官吏。實繫大局安危。必能揮士行之義旗。標茂宏之大節。舉足輕重。立判存亡。其有海內顧廚。先朝耆碩。在昔首陽貶節。原知心在國家。

於今大盜潛移。宵肯助其亂逆。諒同義憤。請共驅除。至若南陽舊部。新室故人。誰非國民。豈任私暱。况悲涼風於斛律。剗地難除。感大樹之飄零。長城已壞。難共憂患。請視韓彭。其必有倒戈以圖。奮袂而起者乎。自餘各界人士。雖未與人軍師之謀。應念興亡有責之義。則匹夫蹈海。義感邦君。小吏登壇。節厲羣后。於古有之。是所望也。堯等痛念阽危。誠發宵寐。力雖窮於填海。志不挫於移山。請負弩以先驅。冀鼓桴之相應。將與摧公路之枯骨。走楊越之居尸。義聲播而黃河清。大旆指而幽雲捲。然後保固有之民國。定再造之舊邦。解此倒懸。綿我華胄。天下自此定矣。諸公其有意乎。乃若覬延漏刻。眷戀穹城。等防風之稽誅。效蜚廉之死紂。則師直爲壯。助順者天。何枯朽之能支。將身名之並裂。勿貽悔於他日。庶有感於斯文。

▲護國軍討袁檄文 維中華民國五年元月始旦。中華民國護國軍政府檄曰。蓋聞輔世之德。篤於忠貞。長民之風。高於仁讓。使梟聲雄夫。野心狼子。逞城狐之兇姿。

弄僭竊於高位。則我皇王孝孫。并世仁賢。誼承先烈。責護斯民。哀恫鬱紆。成茲憤疾。大義敦敕。誰能任之。國賊袁世凱。麤質曲材。賦性奸黠。少年放僻。失養正於童蒙。早歲狂遊。習雞鳴於燕市。集其鳴吠之長。遂入高門之竇。合肥小李。驚其譎智。謂可任使。稍加拂濯。遂蒙葺澤。起爲雄狐。不意其浮夫近能。淺人侈志。味道懵學。騁馳失軫。遂使顛蹶東國。覆公餗以招虎狼。狡詐興戎。缺金甌以羞諸夏。適清廷昏昧。致遁逃刑戮。猶復包藏穢毒。不知愧恥。殫其暮夜之勞。妄竊虎符之重。黃金橫帶。賣辱主於權門。黑水滔天。引強敵以自重。雖奸逆著明。清廷已知。猶潛伏戎羽。隱持朝野。降及辛亥。皇漢之義。如日中天。浩氣颺飛。噴薄宇宙。風雲颺沛。集興武漢之師。士馬精妍。遠響東南之鼓。造黃龍而會飲。納五族於共和。大勢全集。指日可期。天不佑華。誕興賊子。愆彼滿室。引狼自庇。袁乃憑藉舊恩。攀援時會。僞作忠良。牢籠將卒。脅逼孤寡。奪據朝權。復僞和民聲。迷奪時賢。虛結鬼神。信誓旦旦。懦夫懼戎。過情獎許。維時南

京渠帥實亦豁達寡防。墮彼奸計。倒持太阿。參此凶逆。迨大邦既集。威勢益專。遂承資跋扈。肆行兇忒。賄奔虺蜮。碁布陰謀。毒害勳良。搖惑衆志。造作威福。淆撼國基。背法畔民。破敗綱紀。癸丑之役。遂有討伐之師。天未悔禍。義聲失震。曾不警省。益復放橫。驕弄權威。脅肩廊廟。是以小人道長。凶德彙征。私託外援。濫賣國權。弑害民會。私更法制。縱兵市朝。威持衆論。布散金璧。誘導官邪。冀以積威積惡之餘。世風頽靡。廉恥滅沒之後。得遂其倒行逆施。僭登九五之欲。故四載以還。天無常經。國無常法。民無定心。官無定制。丹素不終朝。功罪不盈月。游探驕兵。睚眦路途。貪官污吏。瀆亂朝野。以致庶政敗弛。商工凋敝。猶復加抽房畝。朝夕斂征。價辭公債。比戶勒索。淫刑慘苛。民怨沸騰。兇燄所至。道路以目。此真世道陵夷之秋。天人閉隱之會。四凶所不敢爲。湯武所不能宥者矣。維皇漢九有。奠安東陸。時流漂盪。越在遼迤。緬維祖德。孰敢怠荒。復我邦家。義取自拯。故辛亥之役。化私爲公。志在匡時。道惟共濟。袁乃睥睨神

器。妄欲盜竊。內比姦邪。既多離德。外遂辱饋。甘爲犬豚。是以四郊多壘。弗知慙悚。海陸空虛。弗思整訓。財用匱竭。弗事勸來。健雄失養。弗興學藝。室如懸磬。野無青草。是以養寇外蒙。削國萬里。失馭東魯。屢墮巖疆。要約之興。復倉皇失措。輿璧唯命。遂使滿蒙多離散之民。青徐有包羞之婦。抗我封疆。搥我心腹。皇皇大邦。苟爲侮戮。日蹙百里。媚茲一人。此尤我俠士雄夫所腐目切齒。驚懼憂危。而不可一朝居也。夫天道健乾。義惟精一。在德則剛。制行爲純。故士不貳節。女不貳行。廉恥之失。諡曰賤淫。四維不張。國乃滅亡。自民族國家。威灼五陸。雄風所扇。政驚其公。國競以羣。是以乾德精剛。宜充物里閭。洋溢衆庶。旁魄沆瀣。蔚爲駿雄。故辛亥之役。黜君崇民。揚公尊國。所以高隆人格。發揚衆志。義至精而理至順。故雖舊德老成。去君不失忠。改官不降節。袁氏身奉先朝。職爲臣僕。華山歸放。僅及四紀。載瞻陵闕。猶宜肅恭。故主猶存。天良安在。顧藐然以槽櫪餘生。不自揣量。妄欲以其君之不可者。而自爲其可。是何異

飾馬牛之骨。揚洩勃之灰。以加臭乎吾民。以淫污乎當世。而令我名公先德。爲其賤淫。白璧黃金。渲其瑕穢。此猶我元戎巨帥。良將勁卒。碩士偉人。所同羞共憤。深惡痛絕。而不能曲爲之宥者也。彙此種種。袁氏之惡。實既上通於天。萬死不赦。軍府奉崇大義。慨念生民。謹託我黃祖威靈。恭行天罰。輒宣茲義辭。告我衆士。招我同德。今將歷數其罪。我國民其悉心以聽。夫國爲重器。神嚴尊憚。覆載所同。建國之始。義當就職南京。明其所受。袁乃顧影自慚。妄懷畏懼。陰縱部兵。稱變京邑。用以要嚇國人。遷就受職。使國權出於遙受。玩視國家之尊嚴。其罪一也。活佛稱異。勢等毛羽。新國旣成。鼓我朝銳。相機撻伐。舉足之勞。瞬將威伏。袁乃瞻顧私權。妄懷疑忌。全國請討。置不聽從。遷延養敵。廢時失機。授他邦以蹈隙縱刃之間。失主權於外力糾紛之後。遂使蜿蜒巨嶂。棄此南金。萬里邊城。躍馬可入。貽宗邦後顧之殷憂。損五族雄飛之資望。其罪二也。政體更新。盪滌瑕穢。私門政習。首宜改遷。故內閣部首。須獲議院同意。

所以樹公正之礎。明衆共之義。袁乃病其嚴責。陰圖放佚。於第一次內閣聯翩去職之後。盡登嬖寵。嗾使軍警。圍逼議員。索責同意。用以示威。國人開武力政治之漸。使民意機關。失其自由。宣洩之用。其罪三也。國有大維。是曰法紀。信守不立。溢爲國疑。亂政亟行。於焉作俑。故侵官敗法。爲世大詬。袁爲元首。尤宜凜遵。乃受事未幾。卽不依法定程序。濫用政府威權。誣殺建國勳人張振武。使法律信用。失其效能。國憲隨以動搖。政本因而銷鑠。其罪四也。國憲之立。系以三權。共和之邦。主體在民。立法之府。誼尤尊顯。地方三級。制實虛冗。建國除穢。亦旣罷黜。袁乃急欲市恩。妄復舊制。不俟公決。輒以令行。使議院立法。失其尊嚴。國權行使。因以紊亂。其罪五也。財政負擔。直累民福。外債侵逼。尤傷國權。議案成立。特事嚴謹。衆院贊可。憲尤著明。袁乃私立外約。斷送鹽稅。換借外貲。二千五百萬鎊。厲民害國。不經衆院。瞬息揮霍。不事報聞。蔑視通憲。爲逆已甚。其罪六也。國有元首。政俗式憑。行係國華。止爲民範。袁乃知除

異己。不自愛重。陰遣死士。狙殺國黨領袖宋教仁。以元首資格。爲謀殺兇犯。既辱國體。且貽外譏。國家威嚴。因以掃地。其罪七也。共和之國。建礎爲公。民意所在。亦曰神聖。百爾職司。義宜退聽。國會初立。人民望治。袁恐政制嚴明。不獲罔逞。乃私撥國帑。肥養爪牙。收買議員。籠絡政客。用以陷辱國會。迷奪衆情。使議政要區。化爲搗亂之場。法案遷延。藉作獨裁之柄。其罪八也。元首登選。國有常經。揖讓謳歌。盛德固爾。抑共和定疑。國憲崇廢。悉於是覘。世法凜凜。斯爲第一。袁於臨時任滿。正式更選之際。鄙夫患失。至兵圍國會。囚逼議員。使強選總統。以就已名。至元首尊官。成於劫奪。共和大憲。根本搖動。國是益以危疑。後進難乎爲繼。其罪九也。國民代表。職司立法。非還訴民意。毋得斷闕。袁於總統既獲。復慮旁掣。辜恩反噬。遽爲梟獍。乃假托危詞。羅織黨獄。濫用行政權。私削議員資格。用以酖殺國會。併吞立法。使建國約法。由是推翻。元首生身。等於孽子。其罪十也。國家組織。法系嚴明。苟非選民。焉事造法。袁於狀

殺國會之後。妄以私意。召集官僚。開政治會議。約法會議。冒稱民意。更改約法。摹擬君主。獨攬大權。使民國政制。蕩然無存。澹汗新邦。懸爲虛器。其罪十一也。民國肇造。本以圖存。時風所遷。民疆則興。發揮羣能。騰達衆志。公私權利。宜獲敬尊。袁乃倒行逆施。黜民崇吏。既吞立法。復盡滅各級地方議會。密布游探。誣扳黨獄。良士俊民。任意捕殺。人民權利。全失保障。致羣黎股栗。海內寒心。毒吏得以橫行。民業日以凋瘵。民力壯盛。有若捕風。國勢頽隕。益以卑下。其罪十二也。國基始奠。海內虛耗。財用竭蹶。義宜根本整理。袁乃專事虛緣。日以借債政策。利誘他邦。爲私託外援之計。斷送利權。絕不顧惜。逐鹿爭臭。全集廟朝。遂妄以中北二部。橫斷鐵道。分許他人。惹起國交之猜疑。增益宗邦之危難。其罪十三也。歐陸戰爭。義宜嚴守中立。及時奮進。袁乃內驕外諛。折衝無狀。既反復狼狽。貽羞東魯。復徘徊雌伏。巽立要盟。失滿蒙礦權。至於九處。承他邦意旨。發布誓言。辱國辱民。傾海不滌。其罪十四也。民族虎爭。領土強

食。外債毒國。既若飲鳩。竭澤厲民。何異自殺。袁於歐戰既發。外資猝斷。乃專事括克。內爲惡稅。房畝烟賭。一再搜括。復先後發行內國公債票額逾萬萬。按省配攤。指額求盈。小吏承旨。比戶勒索。等於罰鍰。致富戶驚逃。閭里嗟怨。國民信愛。斲喪無餘。神州陸沉。殷憂可畏。其罪十五也。生利致用。民貴有恆。縱博浪遊。謚曰敗子。盜賊充斥。此爲厲階。修政明刑。首宜致謹。袁乃縱容粵吏。復弛賭禁。使南疆富庶之區。負羣盜如毛之痛。苛政猛虎。同惡相濟。清鄉勦殺。無時或已。政以福民。今爲陷阱。其罪十六也。烟害流離。久痼華族。張皇人道。僅獲禁約。奮厲闕絕。猶懼不亟。袁乃飶其厚獲。倚以箕斂。寵登劣吏。設局專賣。重播官烟。飛揚淫毒。失信害民。辱國貽譏。其罪十七也。民權政治。積流成海。國家公有。炳若日星。世室舊家。且凜茲盛誼。汲汲改進。華族後起。方發皇古訓。追蹤世法。斷脰流血。久而後得。大義既伸。迕則不忠。喬木既登。返則不智。袁乃身爲豪奴。叛國稱帝。監謗飾非。魚然求是。狐假虎威。因以反噬。使凶德播

流戾氣橫溢。妖孽喪邦。甘爲禍首。其罪十八也。易象系天。筮曰無妄。聖學傳經。誼惟存誠。故忠信篤敬。保爲民彝。衍爲世德。袁乃機械變詐。崇事怪詭。貌爲恭謹。潛包禍謀。密電飛詞。興衆口塗芻引鹿。指稱民意。欺世盜名。載鬼盈車。背誓食言。日月舛午。使道德信義。全爲廢詞。民質國華。盡量消失。其罪十九也。維我當世耆德。草野名賢。或手握兵符。風雲在抱。或權領方牧。虎步龍驤。或道係鄉閭。鶴鳴鳳翽。緬矚理倫。橫流若此。起瞻國家。悲憫何如。凡屬衣冠之倫。幸及斯文未喪。等是邦家之主。胡堪義憤填膺。譙彼昏逆。洵應髮指。修我矛戟。盡賦同仇。書到都府。勦耆便合衆興師。郡邑子弟。各整戎馬。選爾車徒。同我六師。隨集義麾。共扶社稷。崑崙山下。誰非黃帝子。孫涿鹿原中。會洗蚩尤兵甲。軍府則總攝機宜。拆衝外內。張皇國是。爲茲要約。曰與全國民戮力。擁護共和國體。使帝制永不發生。義一。畫定中央地方權限。圖各省民力之自由發展。義二。建設名實相副之立憲政治。以適應世界大勢。義三。以誠意鞏

固邦交。增進國際團體上之資格。義四。建此四義。奉以綱維。普天率土。罔或貳忒。軍府則又爲軍中之約。曰。凡內外官吏。粵若軍民。受事公朝。皆爲同德。義師所指。戮在一人。元惡旣除。勿有所問。其有黨惡朋姦。甘爲逆羽。殺無赦。抗顏行。殺無赦。爲間諜。殺無赦。故違軍法。殺無赦。如律令。布告天下。迄於滿蒙回藏青海伊黎之域。

▲唐氏討袁誓師文 維中華民國五年正月朔日。繼堯謹以犧牲酒醴。昭告皇天后土。而誓於師。曰。嗚呼。民貴君輕。萬邦是式。賊人殘義。一夫可誅。矧國是之久成。何逆謀之可宥。魯連蹈海。尙恥帝秦。管甯適遼。不甘臣魏。其有國步方難。羣情望治。遂乃妄侈邊幅。效井底之鳴蛙。夷我華宗。戴塚中之枯骨者哉。粵自武昌首義。中土雲從。五族一家。億姓同德。掃除專制。創建共和。應世界之文明。爲友邦所承認。乃者袁逆世凱。謀叛民國。復興帝制。黃屋大纛。遽興非分之思。礪河帶山。無復未寒之約。移鐘簾於反掌。家天下局勢已成。輸歲幣以尋盟。小朝廷面目安在。亟子孫萬世之私

計。誤國家百年之遠圖。本都督服役民國。作鎮滇疆。痛國家之將沉。恨獨夫之不翦。爰整義旅。恭行天罰。擊祖逃渡江之楫。誓清中原。問新莽指斗之杓。能持幾日。嗟爾有衆。尙其弼予。嗚呼。爾惟克奮厥武。實乃無疆之庥。予亦允報汝功。永有不次之賚。嗟爾有衆。尙欽念哉。

▲致全國軍界電 各省將軍巡按使各鎮守使護軍使各都統鈞鑒。前陳兩電。計蒙鑒察。袁氏違法食言。背叛民國。凡有血氣。莫不痛心。矧在服民國之官。食民國之祿者。迺電告己一週間。響應者固不乏人。尙有多省未聞同申大義。一致進行。兒義不爲。當仁而讓。坐失事機。寧不可惜。意者豈有戀於袁氏之爵祿。不欲舍棄耶。夫袁氏爵賞之濫。亦可謂空前絕後矣。羊頭寵婢。盡受官階。走卒販夫。咸膺爵位。物以稀而可貴。袁氏名器之濫如此。豈尙有價值之可言。果能同舉義師。拔彼趙幟。共和復故。民國重新。則是烈烈轟轟。光耀千載。以視彼燭火之虛榮。冗濫之官秩。曾腐鼠之

不若矣。又豈有感於袁氏之私惠，不忍背棄者耶？吾人所受之官祿，民國之官祿也。受爵公廷，謝恩私室，君子鄙之，何私惠之足云？況袁氏要結雖工，而陰狠實甚。附我者則參之如犬馬，異己者則誅之如寇讎，爲怨爲德，何常之有？今日以私恩之故，徘徊猶豫，異日功狗之烹，可翹足而待。與其噬臍後悔，何如及早決心。左提右挈，成功可必，保節全身，在此一舉。不然，其必以君憲政治爲可行耶？姑勿論世界文明，已趨共治。君主國體，日在淘汰之中。卽就現政而論，袁氏就職以來，摧殘輿論，濫耗庫儲，生殺由心，法律芻狗，民生困敝，呼訴無門，名爲共和總統，實無異於君主專制。凡所設施，皆以爲其私耳。所謂福國利民者，安在哉？其爲總統，猶橫恣如是，則異日之君主可知。今若戮力同心，剷除帝制，推倒袁氏，重建共和，則法美之良規具在，我中華民國巍然繼起於東亞大陸矣。舍此三者之外，則必其劫於積威之故，而不敢發難。不知籌安會發生以來，薄海人民，同深憤恨，賢達君子，高舉遠引，衆叛親離，已成獨

夫攘臂一呼。行見衆山皆應。摧枯拉朽。可操券而決。又或狃於目前之安。憫念民生之苦。不欲變動。貽累地方。不知見小利者反致大害。懷安樂者反貽困苦。況今日我國民之困敝甚矣。不改絃而更張之。又何樂利之可言。今茲之舉。正所以去苦害之域。臻樂利之境。除帝制之毒。復共和之庥。安之大者也。人類以求安爲目的。不此之求。復何求哉。繼堯等計畫已定。著著進行。但有進死。更無退生。非達到還我共和民國之目的不止。諸公皆當世賢俊。手造民國。忍使莊嚴燦爛之名邦。墮於浩劫而不復耶。神州陸沉。誰尸其咎。同舟共濟。大有其人。恐着鞭之先我。願負弩以前驅。切盼深諒熱忱。共興義舉。機緣可惜。宏願必償。蓋以正勝邪。以直勝曲。自然之驗。必至之符也。幸勿存心觀望。坐誤機宜。甘作公民之敵。自貽後至之羞。萬世千秋。永爲世界人之詬病。則幸甚矣。臨電神馳。佇聆好音。

▲致各省滇籍軍官電 廣州龍上將軍。天津朱將軍。新疆楊巡按使。襄陽黎鎮守

使潮陽馬鎮守使。欽縣王鎮守使。虎門要塞黃司令。廣州陸軍第二混成旅段旅長。陸軍第一師部李團長均鑒。袁氏食言背誓。帝制自爲。不惜犧牲四億國民。求在一日天子。堯等一再諫阻。略不顧瞻。乃迫於全省軍民之要求。奉辭伐罪。將與四方豪傑。除此凶殘。前經電陳。諒邀鑒及。惟芟芟愚慮。尙有欲陳於我同鄉諸君子之前者。袁氏罪無可道。夫人知之。乃或瞻望徘徊。未能先發。非特劫於袁氏之積威。抑亦成敗之故。未能深察故也。袁氏勢力在於北軍。而段芝泉馮華甫實中分北軍之勢力。今以反對帝制故。段既被毒。馮亦遭忌。朔方健兒。罔不解體。北京拱衛軍。尙且譁變。遑論其他。衆叛親離。獨夫而已。此其勢力。更何足畏。至於遠賢親佞。立致傾頽。古今中外。理莫能易。乃梁士詒張鎮芳段芝貴楊度顧鼈輩。皆讒詔小人。頑鈍無恥。袁氏則引爲心膂。任以爪牙。其有當代名流。如梁任公徐東海張季直湯濟武諸人。則皆放流竄逐。不保朝夕。讒人高張。正士碎首。瓦解土崩。可爲痛哭者也。夫一國之元首。

中外所具瞻也。袁氏逆世界之潮流。而施專制。復乘歐戰之機會。以便進行。外飾內欺。無所不至。然袁氏之肺肝如見。外人之耳目難逃。以故警告頻來。已窮因應。醜行畢露。無可彌縫。遂使全國蒙羞。五洲騰笑。袁氏而尙有廉恥。早已銷聲匿跡。宵復儼然。民上而不慙。吾民而有血氣。亦豈低首下心。宴然爲臣妾而不怒乎。吾滇人士。痛國維之不張。懼禍至之無日。爰整義旅。誓除神姦。首事不過經旬。風聲已播全國。各省軍民長官。除袁氏少數鷹犬。甘附亂逆外。莫不秣馬厲兵。爭爲響應。各埠僑商。聞風歡忻。亦復慨輸鉅款。以餉義師。振臂一呼。立致百萬。事之易集。前所未有也。夫袁氏曩所恃以侮弄一世者。勢力富厚耳。今官中烏喙。已不復有與共憂患之人。卽竈下羊頭。更何足爲收拾人心之具。尸居氣盡。鼯鼠技窮。義軍所臨。豈有不滅者哉。昔湘軍以一隅之衆。轉戰至十八行省。延垂亡之清祚。更數十年。雖其效忠非人。而義氣之盛。勳烈之隆。猶稱當世。滇軍自民國以來。仗義卹鄰。戰功久著。今更不惜捐千

數百萬人之頂踵。以赴國家之難。成則爲一旅之興。夏不成亦可爲五百之殉。田此亦千載一時之會也。諸公滇中人豪。海內物望。並膺重寄於閩外。久播威稜於國中。當民國締造之初。莫不有後先奔走之力。忍見大盜潛移。舉神明之胄裔以殉一人。且使大好之山河。永淪萬劫乎。所冀奮袂羣興。揮戈並起。或據其肘腋。或按其腹心。犄角之形既成。首尾之勢相應。必能殲此羣醜。保我國民。施聲譽於無窮。奠共和於奕世。國家之福。桑梓之光也。鄉父老子弟。延頸跂踵。以望諸公久矣。諸公其有意乎。堯等力慙填海。志切回天。惟我里仁。同此袍澤。羣策羣力。所望於諸公。愛國愛鄉。請充此一念。敬申誠悃。逖聽義聲。

第十三章 討袁後之出師

滇省既宣布獨立。於是會議軍事機關之組織。時有建議。設臨時元帥府。推唐氏任臨時元帥。召集省議會。爲臨時政府基礎。與北京袁政府對抗。唐氏意不謂然。以爲

吾輩此舉。在實力討袁。不在以空名嚇袁。對於各省。在以大義激發。不在以崇稱號。召且曾經一再聲明。爲爭回國民人格。無一毫權利思想。今遽設立臨時元帥名號。無論袁賊老猾。不爲所搖。其他各省。視吾輩此舉。爲爭權奪利。恐欲表同情於我者。皆以疑忌而灰其嚮義之心。聽我孤軍與袁戰。而大事敗矣。且滇省據西南上游。雖有席捲蜀湘。控制兩粵之勢。但地瘠民貧。交通不便。以之首先發難。則可。若以一隅而抗全局。究不免有螳臂當車之慮。故首義而後。甚望各省仗義響應。然後公推賢能。組織政府。方爲正當。滇省目前。不如廢除將軍巡按使名稱。仍恢復民元時之都督。以爲一省統治機關。較爲妥善。衆議韙之。遂決定恢復都督名義。仍舉唐氏任雲南都督。其後黔桂各省響應。始有軍務院之組織。

軍事機關之組織既定。乃進而討論出師計畫。唐氏以雲南形勢。西南接壤鄰國。無與於今日之軍事計畫。惟東北與川黔桂毗連。出師計畫。關係甚鉅。就三省地勢而

言貴陽者。雲南東戶。辰沅爲湖南西門。以雲南爲根本。奮師東征。以一支由辰沅。逕新化。取長沙。以一支由辰沅。下沅水。取常德。長沙取。北向岳州。踰洞庭之險。以有武昌。常德取。北扼虎渡。規荊州。以指襄陽。有武昌則長江之消息通。有襄陽則中原之消息通。不出旬月。東南大勢。遠屬雲南矣。此上策也。至雲南之險。不在雲南而在西蜀。以雲南爲根本。大舉東上。以一支出叙瀘。進渝夔。下宜昌武漢。以一支出宵遠。過成都。上岷洮。趨秦隴。如是則以西南而忽據西北。天下視聽。必且一新。以爲亞夫之兵。從天而降。此亦上策也。若夫南寧者。廣西心膂。梧州者。西江上游。由雲南展旆而東。駐師梧州。以一支東下廣州。封域綿遠。田壤沃饒。大海南環。五嶺北阻。北出則可以震動江左。東出則可以進據閩浙。以一支由梧州向桂林。踰衡永。浮湘直下。長岳旣得。武漢震驚。此中策也。故據以上所論。我軍進展之時機。可分爲三。(一)我軍勢力完全達到黔桂蜀三省。(二)我軍由黔桂蜀以達武漢閩浙秦隴。(三)回閩浙之

兵以取守勢。進秦隴之兵。相機成迫袁軍右側。然後以武漢主力。大舉北向。今吾兩策並用。三路出師。何患袁逆不倒。衆皆悅服。贊成。於是乃編護國軍爲三軍。第一軍以蔡鐸率之。入川。第二軍以李烈鈞率之。入粵。第三軍唐氏自兼領。預備會師武漢。而先遣一部分自黔入湘。此唐氏首義討袁後之出師計畫也。

第十四章 川粵間之血戰

蔡鐸率護國第一軍入川也。其計畫係分兵兩路。蔡率趙又新顧品珍兩梯團出永寧。取瀘州爲主軍。劉雲峯以一梯團出昭通。取叙府爲奇兵。俟叙瀘克復。卽會攻重慶。以出宜昌。後因黔省獨立。戴戡率黔軍出松坎。攻綦江。以牽制重慶方面之敵。乃改戴部爲右翼。劉部爲左翼。蔡爲中路。同時並進。此第一軍在川之情形也。

民國五年一月十七日。由滇先期出發之左翼鄧楊兩支隊。攻克橫江安邊。二十一日佔領川南險要之叙府。北軍伍祥禎鎮守使受傷退。袁氏聞耗大震。下令褫伍職。

川督陳宦懸賞五十萬。分兵四路反攻叙府。時滇軍已分二支。向瀘州自流井進攻。馮玉祥率勁旅由南溪犯叙。中途被中路滇軍擊敗。馮僅以身免。當蔡抵川境時。川師長劉存厚在納溪響應滇軍。合兵進攻瀘州。滇軍中路遂與左路合。據藍田壩。由下游渡江。攻克瀘州。會劉部川軍被北軍擊潰。瀘城滇軍四面皆敵。仍與川軍退守納溪。北軍曹錕張敬堯大隊猝至。包圍納城。適滇軍趙顧兩梯團長先後踵至。遂與敵軍大戰於納溪之棉花埂雙合場等處。當時張敬堯所部二萬餘人。滇軍僅一師。衆寡懸殊。且械彈遠不及北軍。幸滇軍各將領均身先士卒。躬冒矢石。雖彈如雨集。傷亡過半。亦堅持不退。士氣百倍。故在納溪相持月餘。勝負未決。蔡氏密調叙府左翼助攻瀘州。城垂破。以彈盡退守。時馮玉祥偵知叙府滇軍力薄。以大隊薄叙。叙府遂復失。迨三月中旬。滇軍子彈至。復克敘府。蔡氏下令由江安納溪兩道進攻瀘州。趨江安者連戰克捷。俘北軍千餘人。砲隊殲滅殆盡。張敬堯憤欲自戕。遂佔領江安。

向納溪者亦累戰皆捷。卒克納城。張敬堯王承斌均退守瀘州。不敢出戰。三月下旬。滇軍遂渡金沙江。以困瀘州。瀘城垂破。而廣西獨立。袁氏取消帝制之電至。時戴戡率右翼黔軍已進至綦江。熊克武亦召集舊部佔領隆昌等處。成渝消息斷絕。陳宦既震於護國軍之聲威。復聞桂黔湘獨立。知袁氏大勢已去。乃電懇唐氏及蔡鍔。停戰一月以待解決。迨五月二十二日。陳氏遂以川省宣布獨立。並促袁退位。川滇軍實行攜手。川中戰事遂告停止。

當滇軍入川與北軍鉅戰也。兵力餉械。以及交通。均遠不逮北軍。袁氏斯時。復派北洋虎將曹錕張敬堯馮玉祥吳佩孚等入川。舉北洋系之良將精兵。進攻滇省。欲以短期時間削平護國軍。以遂其統一宇內之野心。識者咸料滇軍之必敗。故雖憤憾袁氏。暗表同情。然皆作壁上觀。無敢響應。滇軍在川血戰八九十日。大敗北軍。威震全國。於是而黔桂諸省。始相繼獨立。假使在此時期。滇軍戰稍不利。無論唐蔡諸人

身命不保。民國亦從此消滅矣。是役也。滇軍以一二師之衆。能勝數倍北軍。雖由於蔡鍔之指揮若定。然非唐氏平日善於訓練士卒。造就將才。臨時之坐鎮運籌。募兵轉餉。則決不足以成此大功也。

蔡鍔率第一軍血戰川南之時。李烈鈞亦率第二軍張開儒方聲濤兩梯團。督師出桂。抵滇桂邊境。適袁氏命龍濟光兄覲光爲雲南查辦使。率兵由桂侵滇。攻陷剝隘。李命張開儒往援。敗龍軍。復剝隘。追至桂邊。日色。適黃毓成率挺進軍亦由黔繞道至桂。大破龍軍。桂督陸榮廷宣布獨立。派兵躡龍軍後。覲光大窘。繳械投誠。並促其弟濟光在粵獨立。滇軍遂由桂入粵。迨陸榮廷岑春煊在肇慶組織軍務院。派代表與龍會議於海珠。談判決裂。各方面羣起討龍。李氏遂率第二軍轉戰於粵漢路一帶。卒賴滇軍之力。將龍氏驅逐。及黎元洪就任。南北統一。滇軍遂長駐粵省焉。

第十五章 平定龍黨亂滇

滇省獨立後。軍隊多調赴川粵前敵。省內治安。僅由少數防軍及團警擔任。唐氏慮各地伏莽乘間竊發。擾亂秩序。乃籌設團保總局於省垣。各縣均設分局。任名望素著之紳耆主持其事。令一律認真舉辦團防。以捍衛桑梓。故雖軍事倥傯。徵調頻繁。而全省治安。毫不紊亂。袁氏初聞滇省獨立。下令褫唐任職。以第一師長張子貞督理雲南軍務。第二師長劉祖武爲雲南巡按使。冀滇省內部自起紛擾。張劉接僞電後。嚴電駁斥。袁氏計不得逞。乃密令龍濟光由粵出兵。相機圖滇。以龍爲滇省江外夷人。其子姪輩多與迤南土匪通聲氣。欲藉其力擾滇。以亂護國軍之後方也。龍濟光是時方新獲袁氏恩寵。晉封郡王。欲爲洪憲開國元勳。乃命其兄覲光率兵假道桂省侵滇。另命其子姪龍體乾等入滇勾結南防土匪。分四路進兵擾滇。是時滇省精兵均在川中前敵。留省者僅少數補充新兵。省防空虛。餉械兩缺。土匪則合計不下三四萬人。且得龍氏接濟餉械。故未旬日即連陷邱北彌勒箇舊等處。臨關

廣一帶大震。省城亦風聲鶴唳。因臨蒙附近滇越路。若龍部匪軍。一旦沿鐵路而上。則省城不守。幸駐蒙第二師長劉祖武。以孤軍據守危城。迤南賴以維持。時唐氏方臥病牀蓐。漏夜召各將領至床前。指授機宜。率兵分道赴援。而以劉祖武爲勦匪總指揮。節制各軍。當省城援軍開抵婆兮時。龍部正猛攻車站。欲奪車撲省。一婆兮至。省火車僅數小時。省軍奮勇擊敗之。遂解婆兮之危。其餘諸道援軍。得唐氏授計。咸能出奇制勝。以寡敗衆。十餘日而各路肅清。龍氏部將或逃出境。或被俘送省。迤南秩序遂恢復。龍覲光行抵滇邊。亦被第二軍擊敗。滇省內部乃得安靖。當龍氏匪軍擾亂迤南時。滇局危險萬狀。此一戰也不惟關滇省之安危。實繫民國之存亡。蓋龍軍若攻破省垣。則川中前敵滇軍。根本既失。後援斷絕。焉能與北軍奮鬪。斯時黔桂亦不能當滇川喪敗之後。冒危難而宣布獨立。民國命運必致中斬。然則唐氏坐鎮之功。實遠勝攻城掠地。身臨前敵者也。

第十六章 任軍務院首長

滇黔桂粵諸省。既相繼獨立。袁氏不得已。乃下令罪已。取消帝制。欲藉此緩和。各獨立省之反對。仍竊據總統之位。爲死灰復燃計。討袁各省。以袁氏既稱帝。謀叛民國。已喪失總統資格。彼既不解職。以聽國人裁判。義軍惟有積極進行。大張撻伐。惟各省當時尙無統籌軍事機關。對內對外。均感不便。唐氏乃電商黔桂各省。在粵籌設軍務院。指揮各省軍事。於五月八日成立。由各省都督各軍總司令任該院撫軍。以合議制處理軍國重事。在大總統黎元洪未能躬親職務時。一切國際交涉。由軍務院撫軍長暫行主持。當時各撫軍。以唐氏爲首義元勳。中外同欽。推爲撫軍長。岑春煊亦爲撫軍副長。唐氏因滇中職守未能遽離。由岑副長代行職權而已。遙領之軍務院成立後。內則浙川湘陝粵等省。及海軍相繼加入。外則得各國承認。西南爲交戰團體。於是討袁軍之聲勢。遂由西南而擴張。至長江流域矣。

第十七章 戴黎收拾時局

唐氏之興師討袁也。其首義時誓告全國文有云。「同人職責惟在討袁。天祚吾民。幸克有濟。舉凡建設之事。當讓諸賢能。以明初志。箇人權利。思想悉予剷除。」故軍務院成立。被推爲撫軍長。卽首先通電各省。擁戴黎元洪爲大總統。並於軍務院組織條例中。聲明軍務院直隸大總統下。俟國務院成立。卽撤廢之。因黎氏當時爲袁世凱幽禁北京。不能執行職務。迨川湘獨立。袁氏大窘。下令取消帝制。與西南議和。唐氏卽通電主張三事。(一)袁氏卽日退位。聽候組織特別法庭審判。(二)援照約法。請黎副總統繼承大總統。(三)從速召集非法解散之國會議員。重謀建設。並添編八軍。大舉北伐。以促主張實現。未幾。袁氏憂憤死。黎元洪於七月六日依法就繼任大總統職。通令南北停戰。以待解決。護國軍之行動。始宣告終止。

護國軍初起時。唐氏曾主張恢復民二時。袁氏非法解散之國會。函致兩院議長張

繼王家襄等請國會在滬自行集會。滇省擔任經費。於是滬上遂有國會議員通信處之成立。預備在滬集會。及黎元洪繼任。唐復電中央。主張四事：（一）恢復舊約法。（二）召集合法國會。（三）改組正式內閣。（四）開軍事會議。原電云：

十萬火急北京黎大總統鈞鑒。項城得罪民國。滇黔桂粵各省。按法恭戴我大總統繼承大位。天心厭亂。項城無祿。北方軍民一致推戴。此民國如天之福。亦我大總統盛德所致也。堯等待罪南中。聞電之餘。除令前敵各軍靜俟後命。并商黔桂諸省徵求同意外。謹先就愚慮所及。今宜急行者數事。呈乞鈞酌施行。幸垂察焉。項城叛國之罪。造端於非法解散國會之日。故凡解散國會以後一切法令。悉應失其效力。今日國家根本法。當以國會解散以前所公布者爲準。此應請明令者。一、根本法既定。則按照總統選舉法。我大總統任期。以前大總統任滿之日爲止。副總統一職。則由國會另選。按照約法及國會組織法。則任命國務員組織

正式國務院。須得國會同意。故應召集前參眾兩院議員齊集天津。剋日開會。以便依法辦理。此應請明令者二。今日綏定全國。首在罷兵。凡因抵禦護國軍派遣之各軍隊。應即悉行撤回原駐地點。庶以表示和平。避去衝突。此應請明令者三。至今茲護國軍之起。事出非常。現雖我大總統出任維持。而善後問題。亟待解決。此類事項。勢不能悉付國會會議。且事機危迫。亦斷難坐待國會開會。擬請召集軍事特別會議。令各都督或將軍。各派軍事代表若干人。在滬集會。諸凡軍事重要問題。悉由該會議決。呈候施行。此應請明令者四。以上四端。均爲全國安危所繫。用敢迫切上陳。伏乞乾斷厲行。民國幸甚。猶有請者。前因我大總統未能就任。南中故暫置軍務院。敬代執行。并經宣告。俟得國會同意。組織之國務院成立。即行撤銷。現仍照此辦理。合併呈明。統祈鈞鑒。

後唐氏主張均見諸事實。以恢復共和之目的。既達。亟應回復。南北統一。遂商各撫。

軍同意於七月十四日將軍務院宣告撤消一切大政奉還中央政府。黎元洪繼任後首詢國會建議定十二月二十五日滇軍首義擁護共和之日爲恢復共和紀念國慶日通令全國每歲屆期舉行慶祝改全國都督將軍爲督軍任命唐氏爲雲南督軍兼省長並授勳一位一等大綬寶光嘉禾章晉級陸軍上將以隆崇報滇軍各軍官之有勳勞者亦分別授給勳位勳章唐氏以滇本瘠省討袁一役公家及地方人民之損失甚鉅瘡痍滿目元氣未復此後裁減軍隊撫卹兵災籌辦善後非由中央撥款協濟不足以謀恢復乃擬具計畫派員晉京籌商然是時中央大政仍爲北洋系把持黎氏雖爲元首毫無實權滇省雖有功民國彼輩陰實仇視因之唐氏及滇人之呼籲北京政府竟置若罔聞而對於效忠洪憲抗拒義軍之龍濟光曹錕吳佩孚張敬堯等反一律擢賞任爲督軍師長等職賞罰顛倒亂機四伏遂復釀成南北第二次之戰爭唐氏當時曾有電致黎段陳述時事並盡忠告原電

云。

萬急北京黎大總統國務院段總理鈞鑒。華密恭讀上月念九日電令。欣悉我大總統總理。俯順輿情。力求法治。苦心毅力。薄海同欽。并聞帝制首禍諸人。皆當按法懲治。從茲國家政治。一切納於軌物之中。言念前途。不勝忭舞。軍務院本有正式政府成立。始行撤銷之宣言。惟國步阨危。應速統一。因電商各撫軍後。經卽於寒日通電。陳明撤銷。諒蒙省覽。本日復奉魚日電令。痛念破壞之餘。復覩威儀之盛。旣深慶幸。彌用憂危。於此猶有不能已於言者。惟垂察焉。滇黔各省之獨立。區區愛國之意。海內外所共見聞。有如我大總統之應按法繼承。與非我總理之不能維持國事。皆早有論列。一致執持。取銷軍務院。雖與前此宣言未符。亦以力謀統一。迅卽實行。此其用心。昭然若揭。乃若龍濟光輩。忽而獨立。忽而取銷。反覆譎幻。惟知私計。且其毒逋全粵。凶德久已彰聞。此實有所謂國家思想與世界眼光。

者。而明令力加獎飾。一似此外各省。其志慮皆出龍下者。此好義之士。所爲憤懣不平者也。夫漢帝卽位。丁公首誅。宋祖酬庸。彥昇終廢。當此四維不張。人欲橫流之時。正賴中央首申禮法之防。庶足以樹風聲而盪瑕穢。若復苟且目前。不惜反羣情好惡之公。而壞國家彰瘴之用。甚非所以厲世而摩鈍。竊恐四方論者。有以測中央之深淺也。夫統治者。中央之大權。而好問者。當國之盛事。今上下未交之日。尤貴有內外相繫之情。我大總統總理就職以來。愚慮所及。迭經呈候采擇。而中央大政施行。未嘗一相諮詢。輒以命令發表。在大總統總理燭照無遺。自己措施悉當。在獨立各省始終推戴。亦既無復異詞。然自軍興至今。各省內情。不無殊異。當軍務院未撤消以前。萬一對於中央命令。有未能切實遵守者。既慮非中央保持威信之道。亦大失各省擁護中央之心。竊謂束縛馳驟。操之不免過蹙。至於高位厚祿。皆專制君主恃以鼓舞人材之資。而非所論於共和之世。卽在專制之

世用之不得其道。術亦有時而窮。誠不可不慎也。今愛國之士。不惜捐棄頂踵。以爭國民一線之人格。其視高位厚祿。當有間矣。故加以意外之寵榮。事乃甚於賤辱。川事方棘。蔡鍔有益武將軍之命。識者已謂不倫。今李烈鈞調京。復有勳三位上將銜之命。在中央顧全現局。誠知別有用意。然論者疑猶是袁故總統侮弄一世之故智。而非有公誠開布之實心。受之若無以自明。不受又嫌於抗命。聞令之下。舉有怵然其不安者。此亦一孔之見。未能仰契高深者也。孔子有言。誠能動物。不誠未能動物。孟德斯鳩有言。民主國之元氣在道德。袁故總統可謂一世之雄。徒以利用僉壬。奮其私智。謂金錢威力足以舉牢羣才。經營有年。卒致失敗。無他不誠而已。不知有道德而已。而敗德所扇。敝俗斯成。詐虞相尋。廉恥道喪。以極於今日。今欲救之。亦惟有以誠感。惟有以德化而已。伏願我大總統總理。深思國民付託之重。鑒於袁故總統致敗之由。務反其道。與之更始。尤當及此建設之日。尊

崇志節。砥勵廉隅。以立人道之大防。成經國之偉業。萬不當輕用智術。取便一時。際國民尙善之心。而忘前車方覆之戒也。我大總統盛德謙光。我總理淡泊宵靜。皆民國興亡所係。又當海內奔湊之時。而繼堯忝膺疆寄。與共安危。知之不敢不言。言之不敢不盡者。念來日之大難。誠不免涓涓之懼焉。惟鑒真誠。恕其冒瀆。全國幸甚。

又國慶日唐氏致電黎總統。辭謝勳位勳章。電云。

北京大總統鈞鑒。巧日奉灰電。大總統令。特授唐繼堯以勳一位。又唐繼堯給予一等大綬嘉禾章。此令聞命之下。驚悚莫名。竊維勳位勳章之設。所以崇獎功勳。旌異才俊。繼堯忝領疆圻。碌碌尸位。忽邀寵命。莫識所由。如以國慶之日。追念前勞。特錫褒榮。用昭曠典。則辛亥革命之役。堯雖負弩屬鞬。在事出力。事定以後。并未受一徽之賞。一爵之頒。爾時卽以淡泊自甘。藉明素志。此時安敢妄膺非分。有

負初衷。如以堯久綰軍符。未嘗隕越。故頒懋賞以勵羣僚。則前此所授勳二位一等文虎章。久已跼蹐不安。適以舉義擁護共和。當然取消。并力主以後宜慎重名器。私心方幸得脫羈縻。豈可食言。有類狐狽。如以此次倡舉義師。摧鋤帝制。神皋舊宇。還我太平。以是爲繼堯功。爲天下勸。則繼堯尤非所敢承也。夫擁護共和。乃國民義所當爲。矧在疆吏。剗除帝制。亦軍人責之所在。矧屬長官。若以分內應有之事。居爲例外。特建之功。則國家何爲頒廩祿以贍百官。人民何事輸租稅以養將士。撫衷循省。有愧良知。覩面對人。尤增慙色。且滇以瘠省。勉舉義師。雖僥倖以有成。實地方父老贊助之功。各將士疆場效命之力。於堯何有。而拜茲嘉命。惶懼無已。況大局雖平。而滿目瘡痍。苦無善其後。死亡將士。遺族零丁。煢獨可憫。更無以濟其窮。撫念及此。寢饋難安。遑敢獨膺榮寵。務懇大總統收回成命。俾堯得免內疚神明。外慙清議。不勝戴感之至。區區愚悃。伏乞鑒原。臨電屏營。悚息待命。

第四編 靖國時代

第十八章 唐氏擁護國會

黎元洪就任後。因手無實權。故中樞政局。仍爲洪憲餘孽所把持。而北洋系之驕兵悍將。黎氏亦優容姑息之。迨段祺瑞組閣。寵任徐樹錚等。擅權獨斷。剛復用事。與黎氏左右哈漢章金永炎等遇事爭執。府院遂發生暗潮。未幾。對德宣戰案發生。段氏主張加入協約。一部分議員表示反對。案未通過。效忠黎氏者。欲聯合國會以倒段。於是府院暗潮之外。復增一閣會暗潮。黎氏乃於五月二十三日下令免段職。任外交總長伍廷芳組閣。遂釀成督軍團之叛亂。

段免職令下後。安徽省長倪嗣冲。以憲法不良爲藉口。謂黎免段職爲違法。國會無異暴民專制。宣布與中央脫離關係。豫陝奉各督軍先後響應。在天津設總參謀部。謀變更國體。廢除約法。並迫黎總統復段職。下令解散國會。西南各省聞訊。憤激異

常。唐氏以護國軍犧牲無量數熱血。始得恢復共和。保全神聖約法。斷不能聽北方少數武人之亂法禍國不問。乃電告黎氏。勸始終守法。勿爲逆黨屈服。當聯合西南各省爲後援。一面電請副總統馮國璋出任調解。以救危亡。並與西南各省協商擁護中央解決大局辦法。第一步聯銜勸告倪嗣冲等。即日返戈息甲。靜候籌商正當辦法。第二步如勸告無效。卽以武力干涉。以維持共和。又通電川中各軍。釋嫌攜手共圖救國。唐氏當時雖準備武力護法。然以護國之後。瘡痍未復。一旦復起兵禍。人民痛苦更深。果能有利和平解決辦法。亦不願過爲己甚。故同時仍以文電敦促各方。冀其覺悟消弭兵禍。茲錄唐氏致黎總統及西南各省三電於後。以見其護法之決心。及希望和平解決之切也。

（致黎總統電）急北京大總統鈞鑒。密逆黨舉兵犯順。肆意脅迫。綱紀蕩然。西南各省業已共舉義師。誓清妖孽。我大總統爲天下人民計。爲民國將來計。均應力

持鎮定。全其始終。萬勿徇調人之請求。出於辭職。致令奸人得志。以爲元首之尊嚴。可以由彼輩左右。且以我大總統之公明仁厚。猶不滿若輩之意。則繼任者更將何以善其後。國事愈不可爲矣。謹特密陳。鑒納。

(致西南各省電)義密。自項城當國。潛蓄勢力。厚植黨援。南北卽隱生畛域。經護國一役。畛域之見愈深。雖南省力求融洽。而彼派別有目的。總時思伸張其權力。駸駸然有加無已。如果能利國福民。吾輩亦何必自存成見。乃此輩徇私罔利。危及國家根本。居心實不可問。此次皖事之生。尤屬毫無理由。現附和者已接踵而起。若不亟圖解決。大局必致糜爛。鄙見姑就伊等所號召者爲進一解。如所云憲法不良。應請大總統以明令撤消所議原案。另組專議憲法機關。體察國情事勢。詳加修正。一面勒令倪等罷兵。聽候解決。諸公如可同意。卽公請陸幹公主稿。聯電各省。一致主張。庶幾有以間執此輩之口。或可冀就此調和息事。縱不然。亦責

之有詞。若復隱忍不言。聽其肆意妄爲。恐國事既傾。吾輩同受舐糠及米之禍。雖欲報國。亦無能爲役矣。當否祈迅決示復爲望。

(致全國疆吏電)均鑒。自倪省長通電與中央脫離關係。奉魯各省相繼而起。當以國家值此風雨飄搖之際。豈堪再有破壞。迭電勸止。戢兵安民。并敦請副總統張巡閱使力予維持。本日復專電皖魯等省切電勸告。計已邀鑒。倘承曲採一二。息事甯人。實國家如天之福。惟日來僞言繁興。事機愈迫。有謂宗社黨圖謀復辟。甚亟者。有謂天津已設立臨時政府者。種種傳說紛紛不一。如果屬實。自召分裂之端。徒致沉淪之禍。眷念前途。憂憤曷已。謹再掬誠一塵清聽。方今國命如絲。朝不保暮。正國人臥薪嘗胆之秋。閱牆禦侮之會。和衷共濟。猶虞不給。乃以一己偏私之見。不惜爲同胞箕豆之煎。逾越軌道。輕啓戎機。縱屬爲國。已類自殺。況以法律爲號召。而先已自陷於不法之地。以外交爲口實。而已有啓內亂之嫌。此固智

者所不爲。亦豈愛國者所忍出。况欲矯正立法。亦自有可循之正軌。沉心靜慮以
求之。未必無救濟之道。若鹵莽滅裂。輕於一逞。無論佳兵不祥。未必遂達希望。而
此端一開。他日之接踵來者。將何法以善其後。徒使一國大法。隨武力爲左右。往
復循環。永無甯謐之日。當此強鄰四逼。國如累卵。循塗守轍。猶慮難以圖存。豈復
尙有時機。容我自擾。苟一妄動。則覆滅隨之。是人不亡我。而我自速其亡也。繼堯
憂時痛國。無涕可揮。惟耿耿寸衷。祇知以盡忠民國。擁護元首。維持共和立憲。爲
唯一主義。倘有鑒其愚忱。許爲千慮之一得者。望卽一致主張。速就此作正當之
解決。若必棄置國家大局於不顧。妄逞威力。肆意橫行。則繼堯惟有傾此血誠。貫
澈初旨。大義所在。性命以之。謹布腹心。幸賜教誨。

黎元洪見督軍團實行兵諫。聲勢汹汹。乃派王士珍及張勳出任調人。協商解決辦
法。王張與督軍團會議結果。要求黎氏解散國會。爲督軍團取銷獨立條件。黎氏不

得已從之。遂於六月十二日下令解散國會。唐氏見事已決裂。無可挽回。乃與黔桂粵等省通電。全國聲明西南各省並無解散國會意見。另電黎請明令懲辦稱兵干政之督軍團。並與川湘黔粵桂當局協商團結西南內部武力擁護國會之進行。南北局勢遂從此破裂焉。唐氏反對解散國會。致黎總統及西南各省電如下。

(致黎電)急北京大總統均鑒。接馮副座佳電。擬合請以明令解散國會。爲調停之計。在我大總統委曲求全。或不惜曲徇其請。然以繼堯管見。若議員自行辭職。或離職人多。大總統以不足法定人數。下令改選。較爲合法。若以明令解散。流弊滋多。必仍滋生擾亂。除電復外。謹陳鑒察主持。

(致西南各省電)義密。幹月兩公。元電謂一致維持共和。擁護元首。至佩公義。惟頃聞已明令解散國會。顯係奸人脅迫。挾制而行。共和已從根本破壞。元首行將辭職。是吾輩宗旨兩已失之。後此不法之舉。更將環起迭興。坐待時機。必將淪胥。

共溺。非速準備實力。團結一體。不能得正當之解決。出師計畫。應照迭電所商。積極進行。幹月兩公。卓識毅力。尤望挈提主持爲盼。

第十九章

滇省聲討復辟

國會解散。督軍團方取消獨立。不意復辟之事。忽發現於北京。先是張勳率辦子軍。盤據徐州。跋扈專橫。久有不軌之謀。袁氏死後。帝孽楊度。梁士詒。顧鼇等。因避通緝。逃匿張勳幕中。挑撥政潮。督軍團叛亂之前。倪張等累在徐州會議。馮段及北洋系各督軍。均派代表秘密參加。時復辟謠言。已傳佈各方。及倪嗣冲稱兵迫黎。在津會議。舉徐世昌爲總參謀。張勳奉黎命北上調解。遂率辦子軍入京。國會解散。張乃於七月一日。擁溥儀復辟。稱宣統九年。頒僞詔。封各省督軍省長爲總督巡撫。張爲弼德院院長。內外僞官數百人。並僞造黎元洪奏請歸還大政表文。黎時避入公使館。密派代表。賚總統印綬南下。促各省討賊。

唐氏得復辟消息後。憤激異常。立通電各省。誓師聲討。編制靖國軍八軍。將親率出發。並與西南各省商出師計畫。擬以駐川滇軍合川軍。由渝出夔。萬進攻荆襄。駐川黔軍合川軍。分出陝西湘黔兩省。合力攻岳。會師武漢。駐粵滇軍及粵軍攻贛。桂軍出福建。牽制江浙。準備大舉會師北上。永靖民國。亂源唐氏討伐復辟之通電云。

(銜略)本日接京電。載有宣統僞上諭一通。稱係據張勳等奏請復辟云云。不勝駭異。查張勳在徐州聚集兵衆。收納叛亡。包藏禍心。爲日已久。此次因政局變爭。藉調人之名。擁衆入京。值政府無人。議員星散。遂敢蹈瑕抵隙。挾清室幼冲。妄倡復辟。孺子不過尸名。老賊行將自取。所謂司馬昭之心。路人皆知者也。當其北上。瀕行。電文往來。已露叛國形迹。繼堯曾累以正義規戒。冀有以戢其奸謀。不謂梟桀性成。徒勞翰墨。引胡羯以升堂。縱豺狼於當道。背叛之罪。上通於天。斧鉞之誅。欲容無地。繼堯疊經患難。警衛共和。歷百折而不回。卽一擲而何悔。用是師陳牧。

野。旗指燕徐。現已集中所部。編成靖國各軍。剋日出發。誓將廓清妖孽。還我共和。張民國之綱維。循世界之趨勢。凡我同仇。共負斯責。關東州郡。定興誅卓之師。河北英雄。會草扶漢之檄。用敢馳佈。乞賜垂察。

第二十章

親赴川黔督師

當唐氏通電全國。聲討復辟。準備親出督師時。川軍第二師長劉存厚。因受北洋系之煽惑。驅逐川督羅佩金。自稱督軍。累次進攻滇軍。唐氏以國事日急。滇川宜捐棄夙嫌。合力禦侮。力勸川中各軍。聯合協作。不意劉氏復受溥儀偽巡撫職。圍攻成都。戕殺川督戴戡。排斥駐川之滇黔軍。阻滇軍北伐之路。唐氏以劉既甘受僞職。背叛民國。實屬罪不容道。且川滇唇齒。與共義師北伐。必須經川。內亂未弭。後顧多憂。乃令駐川滇黔軍。先平川亂。再出師北伐。並將真象宣告各方。唐氏亦由滇親出督師。移駐黔省畢節。其臨行時通電云。

(銜略)繼堯前以復辟實現。國勢阽危。化日光天。橫行魑魅。若不亟行撻伐。何以奠安民國。當經編集靖國各軍。擬卽躬率北上。助諸公一臂之力。謀國家百世之安。乃師行在卽。而川變警耗適至。滇川唇齒相依。休戚與共。權其緩急。自不能不以靖國之軍。先盡卹鄰之誼。纓冠披髮。責無可辭。茲於本日由滇啓行。親督三軍。誓除叛逆。川省爲義師必經之地。倘內亂未弭。則後顧多憂。故思惟北征。宜先靖蜀。若先發諸將。遂已克平川亂。卽劍及屣及。與諸公會師燕薊。迅掃逆氛。否則不能不稍延時日。暫顧川局。總之繼堯受國厚恩。矢志擁護共和。頗聞張勳近日。猶頑強抵抗。盤踞京邑。如國賊不除。國法不立。破釜沉舟。義無返顧。肝胆塗地。所不辭也。今當師旅頻行。謹掬誠奉告。

第二十一章

滇省宣布護法

張勳之擁溥儀復辟也。跡近兒戲。故雖北洋系各督軍。亦徘徊觀望。不願附和。段祺

瑞乃收集舊部。在馬廠誓師。組織定國軍討張。北方各省咸響應段氏。戰未旬日。張勳勢孤。遁入使館。復辟取消。段氏遂復入京執政。

段祺瑞既入京。仍自稱總理。是時馮國璋已在南京就代理總統職。黎元洪辭職赴津。當時唐氏以段苟能依法解決國事。則西南當仍服從中央。因致電段氏賀其戡定亂事。並要求奉迎黎總統復職。退就私第聽候召集國會。組織正式內閣。不意段氏早存武力統一全國決心。先利用督軍團以倒黎氏復利用復辟以攫取政權。對於西南要求之迎黎復位恢復國會組織合法內閣等條件置之不復。陰促馮國璋入京繼任。迨八月一日馮抵京。遂與段氏合謀以武力對付西南。

袁世凱死後。北洋系兵權分統於馮段二氏。此次馮段乘復辟之變。一則以副座而奪元首之位。一則以被免職之總理而擅組閣。皆屬違法自私行動。西南各省因而有護法自主不受非法內閣命令之計畫。於是馮段爲擴張勢力先發制人計。馮則

取蘇贛地盤。段則謀川湘兩省。南北二次戰禍。遂從此開幕。

唐氏是時。以北方非法組閣。違反共和精神。累勸告不聽。復挑撥川亂。壓迫西南。因與西南各省協商一致行動。於民國七年七月內。宣布雲南護法自主。不承認非法內閣一切命令。並以擁護約法四義通告全國。(一)總統因故不能執行職務時。當然由副總統代行職權。惟故障既去。總統仍應復職。否則應向國會辭職。照大總統選舉法第五條第一項辦理。(二)國會非法解散。不能認爲有效。應即召集開會。(一)國務員非經提交國會同意。由總統正式任命。不能認爲合法。(二)稱兵抗命之禍首。應照內亂罪按律科辦。以彰國紀。自唐氏護法四義宣布後。海內均知滇省自主。係爲擁護國法。而與北洋系抗。頗表同情。海軍首先宣布獨立。南下護法。湘省零陵鎮守使劉建藩。旅長林修梅。亦響應。川中之熊克武。亦與滇軍聯合。驅逐吳光新。西南數省。仍回復護國討袁時之局面。

第二十二章 靖國軍之聲威

唐氏抵畢節後。以護法救國大義。訓勉滇黔軍。令從速肅清川亂。會師武漢。並以國事日急。滇川應釋嫌攜手。努力大局。對於川中向義友軍。開誠接洽。於是川軍將領熊克武。但懋辛。石青陽等。均加入滇黔聯軍。推戴唐氏爲三省聯軍總司令。一致行動。川中滇軍聞唐氏親出督師。士氣大振。累戰克捷。吳光新。狼狽離渝。川局遂大定。三省將領會議於重慶。僉以川省善後及北伐大計。亟須唐氏來渝主持。乃派代表歡迎唐氏來渝會商。唐氏迫於各方之敦促。遂於七年九月中旬。由畢節赴渝。

唐氏既抵重慶。就滇川黔靖國聯軍總司令職。遂委熊克武爲川軍總司令。劉顯世爲黔軍總司令。滇軍擴張爲八軍。任顧品珍。趙又新。黃毓成。葉荃等爲軍長。謀分出陝鄂湘豫會師武漢。策應各方。以達澄清中原。解決國是目的。是時湖北荆襄鎮守使黎天才。第一師長石星川。獨立於荆襄。黎爲滇人。被鄂省各軍推爲鄂靖國軍總

司令。乃電唐氏。以鄂軍加入滇川黔靖國聯軍。願受節制。未幾陝西靖國軍總司令于右任。副司令張鈞。獨立於三原渭南等處。亦受唐氏直接指揮。此外豫則有王天縱。湘西則有田應詔。張學濟。周則范。閩則有方聲濤。伍毓瑞。皆以靖國軍爲號召。而隸唐氏部下者。當時唐氏所指揮之靖國軍。其區域則達八九省。人數則有二十餘萬。聲威遠播。長江黃河以北。蓋護國以來所未見也。

第二十三章

唐氏就總裁職

民國六年。孫中山伍廷芳率海軍蒞粵護法時。被解散南下之國會議員。亦在廣州開非常會議。謀組織西南各省之軍事機關。以資聯絡。號召。八月三十一日。公佈軍政府組織大綱。設軍事聯合會。政務委員會。舉孫中山爲討逆大元帥。唐氏及陸榮廷爲元帥。主持一切。並推副議長褚輔成。議員王湘吳宗慈王乃昌李華林等。資元帥印。綬來滇。請唐氏就職。時唐氏以西南護法。端賴各方協助。當局者自宜以交讓

之精神。求進行之實際。若標舉過高。轉恐窒礙進行。護國之役。滇以不設臨時元帥府。而得各方響應。卽其明證。欲俟軍事稍發展。再行就職。因一再電國會。謙辭。迨川湘戰事起。川軍得滇黔聯軍援助。驅逐吳光新。離渝。全川底定。湘省亦得粵桂聯軍援助。克復長岳。遂傳良佐於境外。十一月十五日。段祺瑞之主戰失敗。辭總理職。馮國璋任王士珍組閣。向西南求和。是時西南局面已漸發展。七年五月十八日。國會復修正軍政府組織大綱。採委員制。推選唐氏及孫中山岑西林陸榮廷程璧光伍廷芳唐紹儀七人爲政務總裁。主持政務會議。唐氏辭不獲。已乃宣布就職。由七總裁通告中外。以擁護國會。恢復約法爲職志。一俟北京政府悔禍。時局方可望解決。

第二十四章 反對非法議和

馮國璋授意直系督軍李純陳光遠王占元等主和失敗。南北二次戰禍復開。然直皖兩系之暗潮。已漸趨嚴重。迨曹錕吳佩孚攻佔長岳。駐防衡州後。遂高唱和平論。

調。以抵制段派。民七之秋。徐世昌被安福國會選爲總統。徐素以文治派領袖自命。就在後對南北時局。力主和平解決。時北方軍人如馮玉祥等。亦繼起要求。全國政客名流及中外輿論。鑒於南北相持不下。戰禍延長。徒糜爛地方。皆起而爲和平運動。於是南北當局。商定倣辛亥成例。在滬組織對等和平會議。各派代表十人。北以朱啓鈴爲總代表。南以唐紹儀爲總代表。在滬議和。討論政治法律各問題。唐氏以謀永久之和平。在先。解決法律事項。請軍政府以依法永久四字爲謀和宗旨。並擬具對法律意見。(一)由舊國會制憲法。選總統。請新總統施行新憲法。組織憲法上之國會。(二)國會非法解散後。北京政府各項借款。未經國會通過以前。西南各省不承認。不意北方當局。放棄法律。趨重事實。磋商數月。尙未解決。主戰派復乘和議期間。大舉攻陝。南北代表向北京政府力爭停戰無效。全體辭職。和議遂停頓。和會破裂後。各方面要求維持之聲不絕。徐世昌乃撤回朱啓鈴。而任王揖唐爲北

方總代表。令與西南繼續會議時軍政府以王氏係非法國會議長與西南護法主張。絕對不相容。要求北政府另派代表開議。和會復二次停頓。徐氏以西南堅持法律問題。不易解決。乃變而進行局部接洽。偏重事實。密與旅京滇籍國會議員協商。雲南方面之調解。擬任唐氏爲川督。或滇督兼滇川黔巡閱使。要求雲南對法律問題。不必堅持。並謂兩粵方面已在進行。若先解決滇省。決無此優厚條件。某議員電告唐氏。唐除嚴電拒絕外。立將原電轉致西南各省。以北方此種舉動。實欲離間西南護法團體。並聲明嗣後和議仍由上海和會磋商。若和會不能復開。請軍政府主持。公開辦理。西南各省萬不宜與北方單獨接洽。自喪人格。唐氏並陳述維持全局辦法。(一)護法各省各軍共同組織之軍政府。應始終擁護維持。(二)請軍政府主持與北方續開正式和議。凡關於國家事件。由護法團體公決。(三)和平條件。應讓步至何限度。由軍政府酌定辦法。徵取各軍同意。一致主張。(四)各省有特別事宜。

由軍政府與各省各軍妥商辦法。而嚴拒北方之單獨誘和。當時各派果能堅持護法宗旨。不爲北方之權利所餌。則西南團體斷無破裂之事發生。

是時軍政府主席總裁岑春煊。被□□□包圍。□□見滬會破裂。欲以軍政府名義包辦和議。向北方交換相當權利。首先謀兩粵局部接洽。事聞於外。孫中山伍廷芳唐紹儀三總裁。相繼辭職。國會亦提出不信任主席總裁案。政系以粵中政潮日烈。進行愈急。欲聯絡唐氏。共同北附。唐氏對於此次西南護法主張服從正義。堅持到底。見軍府當局之遷就苟和。違反護法精神。深致不滿。乃繼孫唐伍三總裁後。通電聲明總裁不足法定人數。軍政府政務會議已無成立理由。所有一切政治行動。當然無效。蓋慮□□□假藉軍府招牌。裨販西南各省也。唐氏一方面並聯合川湘黔各當局。通電促和。仍認定滬會爲和議正軌。一切公開。以免被政客居間利用。政學系既失所憑藉。遂慫恿桂系陸榮廷莫榮新等。向北方單獨媾和。因此促成陳炯明

率粵軍返粵。粵桂戰事既發生。岑陸莫等均通電取銷護法。宣布服從中央。及桂系在粵失敗。廣西遂實行北附。西南團體因內訌而破裂。於是岑陸聯直。民黨聯段。向之視北方爲敵者。至是且不惜犧牲主義。與之攜手以謀回復政權。其間能始終堅持護法宗旨。不爲權利所動。而與暴力抗衡者。僅唐氏一人。然以結怨於□□□之故。其結果則川粵部下均被政系運動。與唐氏爲敵。遂釀成民九滇中之政變。

第二十五章 實行廢督裁兵

西南以護法主義與北方之武力統一奮鬥經年。時局之混沌如故。國人既飽受兵禍厭戰之心。南北一致和平會議中。廢督裁兵。實行自治問題。遂爲各方所注目。唐氏亦鑒於武力不足救國。謀順應潮流。解決國事。乃毅然實行廢督自治。於九年六月一日。解除雲南督軍職務。通告南北。實行自治。救國並勸川桂黔諸省一致行動。此蓋唐氏歷年用兵之大覺悟。實行民治之鮮明表示也。其通告全國廢督自治電。

云。

自悍督稱兵。國會解散。復辟繼起。總統去職。法紀凌替。國本動搖。繼堯蒿目時艱。深維治本。以爲法律未能尊重。卽國家無由奠安。爰及同人。宣言護法。乃武力統一主義與法治不相容。南北兩方。遂至以兵戎相見。馴至國力益耗。民病愈深。吾人鑒於戰禍之不可以久延。乃順國民心理。而主張和議。繼堯曾擬訂條件。除於法律外交兩問題。求正當之解決外。並擬裁兵廢督。以弭爭端。方冀和議告成。履行條件。庶可以拔除禍國之根本。導揚民治之精神。不意和議累停。經年不決。南北內部。愈益糾紛。在南方則粵中事變。方幸救平。而川省戰機。又復勃發。在北方則吳趙爭豫陳許。爭秦而湘皖直奉之間。亦正磨刀相向。此外之禍機潛伏。待時而發者。尙不知凡幾。亂轍相尋。迄無止境。土崩魚爛。可爲寒心。夫歐戰告終。人心厭亂。羣方趨重民治。以恢復和平。而吾國乃日事同室操戈。以自取亡滅。推原禍

始。皆由督軍制爲厲之階。今既和議之成，尙難預定。而海內洶洶，僥焉不可終日。此時惟有卽行廢督裁兵，爲曲突徙薪之計。繼堯遭國多故，忝握軍符，既覩建國之坦途，尙復何心於權位。實行廢督，請從堯始。茲已於六月一日卽行解除雲南督軍職務。雲南督軍一職，卽於是日廢除。所有全省軍政，劃爲三衛戍區域，由衛戍司令官分別擔任。至全省民政事宜，概由省長主持辦理。繼堯暫以聯軍總司令名義，保衛地方，收束所部隊伍，以免兵冗餉絀，貽國家以鉅患。一俟裁兵事竣，卽當解甲歸農，退安田里。至督軍制度，積藩鎮割據之遺風，阻礙平民政治之實現。欲謀廢此弊制，舉國早有同情。亦望當局諸公，爲銅山洛鐘之應，救國自救。當本後人繼堯首倡實行，原非徒爲宵身計。當就力量所能及，在範圍以內，貫澈此旨。力促其成。倘有擁兵自衛，抗此主張者，則是自便私圖，不恤國難，願與同志共棄之。敬佈。困沈。尙祚亮察。

唐氏既通電廢督。遂將全省劃爲三衛戍區。由衛戍司令官分別擔任區內治安。全省民政概歸省長主持。已則暫用聯軍總司令名義保衛滇省治安。收束川黔部隊。對川事完全放棄。聽川人自治。將所部駐川滇軍調回。改編爲東防軍。任顧品珍爲東防督辦。及改編完竣。唐氏乃通電裁撤聯軍總司令。聲明閉關自治。整理內政。以市政爲民治基礎。特組織雲南市政公所。倡辦市政。認教育爲救國根本。概捐鉅資。開辦東陸大學。唐氏在是時。蓋以全力注意建設矣。其裁撤聯軍總司令職。通電云。頻年以來。軍閥專橫。民治無由實現。國脈凋敝。險衆迭呈。繼堯特鑒於社會之潮流。順應人心之趨向。倡爲廢督裁兵。實行民治。以期共和。到治順軌。進行暫以聯軍總司令名義。維持地方。邇者所部駐川各滇軍。業已退守邊境。改編收束。大致就緒。並聲明從此閉關自治。不以武力解決時局。聯軍總司令部。已無存在之必要。應即裁撤。所有維持地方各事宜。即由各衛戍區司令負責辦理。其民政事。仍

由省長完全擔任。繼堯即日解除職務。俾資休養。以踐息壤之言。凡我同志。其共鑒之。

第五編 政變時代

第二十六章 政變之遠因

庚申之秋。川軍將領劉湘楊森等。藉口川人治川。實行排斥客軍。滇川戰事復起。滇軍第二軍長趙又新。遇難於瀘州。第一軍長顧品珍。率殘部退駐川滇邊境。受川軍之運動。倒戈攻省。唐氏不忍糜爛地方。潔身下野。滇中經此次政變。軍隊系統遂破。裂。顧爲唐氏健將。在川血戰有年。尙以中途叛變。其原因複雜。蓋醞釀已非一朝一夕矣。

顧氏之叛唐也。其遠因實受北京政府及口口口口所運動。蓋滇軍將領與北洋系。在民國歷史上。卽有絕大惡感。當辛亥滇省舉義時。北洋軍官在滇練新軍者。如靳雲

鵬曲同豐諸人。皆被逐出境。彼輩箇人私憤。固未嘗一日或忘。及護國之役。唐氏首義討袁。當時如曹錕張敬堯吳佩孚馮玉祥輩。皆躬爲袁氏鷹犬。附逆抗義。一旦西南護法得志。彼輩在民國必無立足之地。且滇軍勇敢善戰。唐氏領袖西南。實爲北洋系武力。統一中國之大障礙。因之北方當局對唐氏疑忌愈甚。武力既不能壓服。乃一變而從離間。滇軍內部着手。適與唐氏同學之李鴻祥張子貞等。以不得志於滇。憤而投北。李張輩久縮軍符。與駐川粵滇軍將吏皆有故舊之誼。於是北京政府乃利用此數人奔走接洽。使之反對唐氏。以滅西南護法派之實力。顧氏之反唐。蓋受其煽惑也。

八年粵中軍政府內訌。民黨與岑春煊陸榮廷決裂。岑受□□□包圍。欲實行北附。並要求唐氏取一致行動。不意唐氏反對非法議和。否認政務會議一切行動。於是唐氏與□□□□□乖離。□系啣恨唐氏。嗾李根源率駐粵滇軍與唐脫離關係。

此爲滇軍團體之第一次破裂。□□□復乘間派人入川說顧倒唐。顧氏左右既充滿反唐之空氣。其結果遂演成滇軍內訌之事實。

第二十七章

政變之近因

顧氏外受北京政府運動。內被□□□離間。雖稍有異志。然駐川滇軍兩軍皆直接服從唐氏。使無環境變化。顧氏亦絕對不敢倒戈攻唐。會川滇戰事發生。滇軍失利。第二軍長趙又新。素忠於唐氏者。在瀘受傷死。所部無主。歸顧氏指揮。顧既擁有全部軍隊。乃藉口士兵厭戰。通電撤防回滇。時北京內閣總理靳雲鵬聞訊。復電獎譽顧氏。稱爲血性男子。愛國軍人。並密令川軍將領與顧氏妥爲接洽。滇軍駐川數載。川軍畏之如虎。川將楊森劉湘等。至是認爲驅滇軍離川之機會。乃與顧氏密訂條件。許助以餉械兵力。促顧氏回滇倒唐。顧遂率滇軍退至黔滇交界之畢節。九年十一月。顧率軍退駐畢節。尚不敢遽入滇。時唐氏已微聞顧有異志。乃派員往

晤顧氏。詢其真意。顧力白無他。表示始終擁唐。使者返滇復命。唐乃任顧爲東防督。辦令改編部伍來省。會商大計。撤退沿途間諜。以示推誠。並在省代設行署。盛儀招待。顧遂率心腹軍隊兩團。行抵滇東。宣威適駐省之第八軍叛變。竄擾省垣附近。安寧呈貢嵩明各縣。闔省震動。援兵四集。顧藉患病。頓兵觀望。陰召集軍事會議。籌商進止。是時楊綦鄧太中援川失敗。懼唐氏以軍法相繩。乃密勸顧乘省垣空虛。兼程往襲。顧聽之。率所部由宣威晉省。

第二十八章

唐離滇情形

先是唐氏得顧表示態度。願受改編之訊。以爲顧對已決無異意。因之對顧軍毫無戒備。及第八軍叛變。省中精銳均派赴前敵。始聞顧氏兼程襲省垣訊。乃漏夜召集軍事會議。各軍官以顧氏在川作戰不力。喪師失地。致滇軍出師武漢。計畫橫受打擊。已罪無可道。况受北方及川中敵軍運動自由。撤防回滇。擾亂若不以武力制裁。

不惟開犯上作亂之風。致滇軍軍紀隳地。且護法策源地之滇省。此後恐無安寧之日。僉議決以武力討伐。是時第八軍亂事將平。乃一面飛電檄調前敵各軍來省應援。一面籌備作戰計畫。唐氏自率警衛軍任中路。田鍾毅旅長當左路。楊綦當右路。赴距省一站之板橋等地防禦。以免省垣受兵禍。唐氏以顧軍僅三團。其餘各部尙存觀望。若以省軍往禦。相持三四日。俟各路援軍齊集。亂事不難肅清。又以駐川滇軍均已舊部。此次叛變者。僅顧氏及少數將領。決不能因一二人之故。使頻年在外。久戍思歸之健兒。橫受摧殘。乃派員往謁顧氏。磋商和平解決。冀顧氏覺悟。免除戰禍。唐氏佈置既竣。準備次日親出督師。不意忽接楊綦電辭右翼指揮。未幾楊及鄧泰中等與顧部旅團長聯銜請唐下野。電至。唐以楊既附顧。戰禍一開。雖勝負難決。但省垣附近必遭糜爛。自護國以來。滇以貧瘠之地。歷年用兵。元氣凋喪。公私交困。若省內再發生戰事。人民受禍。寧堪設想。且與宣布廢督自治保境安民之宗旨大

背乃決定犧牲權位。潔身下野。以保全桑梓安寧。

唐氏離滇之心既決。遂將民政交省長周鍾嶽主持。省垣治安委憲兵司令李天保。警務處長秦光第擔任。其餘財政機關如省立銀行籌餉局軍需局所存款項均令妥爲保存。唐氏於民十陰歷元日。日率親信衛隊百餘人及眷屬等從容搭滇越車離省。臨行佈置週密。閭閻不驚。故民間初尙絕無所聞。

唐氏抵蒙自時。省中先派往勦第八軍之各部。方奏凱班師。奉調晉省應援。及聞唐氏抵蒙。異常憤激。咸願護衛唐氏返省討伐叛軍。唐氏以自身既宣布下野。不願再發生戰禍。徒苦人民。遂召集各軍演說離滇苦衷。勉各軍服從命令。保全桑梓捍衛民國。三軍爲之感動。泣下。唐氏留蒙撫慰各軍。一日。乃將護送之警衛軍及直轄各旅團。令第二衛戍司令李友勳收編。卽由蒙乘車赴河口。

唐氏雖下野。其平素能直接指揮之軍隊尙有兩師之衆。彼爲保全地方。慨然放棄。

政權其行動實與其他武人之勢窮力竭被迫下台者不同故滇人對之皆惋惜不置其臨行時對於地方治安附託有人公款庫帑絲毫未取滇人皆德之乃於顧品珍抵省後由各界發起派代表購物品乘車至河口歡送唐氏並設宴祖餞此尤爲歷來疆吏下台時所罕見也

第二十九章

粵港之歡迎

唐氏爲擁護共和元勳護法派領袖數年來爲主義與北方軍閥奮鬥雖累遭艱厄未嘗中途變節其人格固有足多者此次滇中政變雖由於一部分將領所不滿意然其遠因實爲唐氏始終堅持護法反對非法議和致遭北方當局及政學會之離間其部屬所致從正義方面言唐氏之下野其行動甚光明故抵越南之河內海防時該地華僑紛紛開會歡迎並有派代表至車上慰問者法國河內總督以滇越比鄰唐氏督滇數年中法邦交異常親睦聞其入境甚表歡迎待以國賓之禮是時廣

州已爲粵軍克復軍政府亦恢復國會議員以唐氏係軍府總裁護法元勳特發起派代表歡迎蒞粵就職主持西南大計於是孫中山以下各要人均派代表赴港迎唐晉省

唐氏抵海防時本擬赴國外遊歷不問時事嗣因粵中各方面熱誠歡迎堅請唐氏蒞粵繼續護法事業唐氏不得已允赴粵一遊迨抵港則歡迎代表百餘人來謁征塵甫息卽邀請赴粵抵廣州後各機關歡迎者每日不下數十處幾有應接不暇之勢僉以唐氏爲西南實力派領袖一旦與中山攜手時局必有新發展當時熱心護法者頗爲西南大局抱樂觀焉

唐氏離滇後滇省軍隊之直接屬唐指揮者尙有一師之衆合之駐湘黔滇軍不下三四萬人軍府各總裁以唐氏威望昭著擬召集軍事會議推唐任陸軍部長兼滇川黔聯軍總司令統率全部滇軍益以粵省軍隊籌備北伐唐氏見各方面推誠歡

迎亦慨然表示願始終合作並在政務會議提議任顧品珍爲滇軍總司令泯除私嫌共謀西南內部之團結

先是孫中山自經□□系之排斥□□認合議制不良及粵軍返粵軍府恢復主張仍取□□□□□□□□議員組織總統選舉會□□□總統唐紹儀伍廷芳陳炯明及民黨一部分議員俱不贊成唐氏亦以西南揭櫫護法自身不宜□□□□□□頗主慎重□□□□□□□□十年五月一日以非常會議選出中山爲大總統反對選舉之議員多被毆辱於是國會內部分裂議員星散唐紹儀孫洪伊等均赴滬唐氏見西南事□□□且陳炯明對中山陰有異志粵政局暗潮已醞釀不欲陷入政潮遂通電解除政務總裁及參謀部長職返港養病

第六編 返滇時代

第三十章 返滇之動機

顧品珍初返滇時。滇人對顧感情尙洽。蓋顧氏曾宣布軍民分治。整頓內政。不問外事。滇省歷年爲國用兵。元氣凋殘。人民頗希望顧氏能實行門羅主義。休養生息。不意顧氏自兼省長後。一切設施。大失民望。對於民政方面。如市政教育。在唐氏時代。已漸有革新基礎。及顧執政。遂根本推翻之。甚至各縣知事。半委軍人。以致吏治日壞。政局泯棼。其貽禍地方最鉅者。如勦匪一事。滇省交通不便。匪患素熾。唐氏執政時。費數年之力。始將大股匪患肅清。匪首楊天福。吳學顯等。均招撫至省。以恩威攝伏。不意顧氏執政後。慮楊吳反覆。以計誘殺楊。吳竄至迤南。集合民軍。誓師討顧。同時楊之舊部。亦嘯聚數千。擾亂迤西。聲言復仇。省垣附近。行旅裹足。顧氏命羅佩金爲迤南巡閱使。率駐通海旅長金漢鼎所部。及唐氏舊部之十三四五團。圍勦吳部。轉戰數月。未平。迤南各屬。戰禍蔓延。同時顧命部下。勦近省股匪。慘殺良民數百戶。民怨沸騰。顧氏部下將領。因爭權之故。復時起內訌。省垣幾遭糜爛。於是民心思唐。

各界派代表赴港請唐返滇者日有所聞。駐南防第二衛戍司令金漢鼎且密電願爲內應焉。

是時粵中方盛倡援桂北伐。僉主張推唐氏爲滇粵桂聯軍總司令。率師援桂。俟桂局解決。卽出師北伐。中山累派代表赴港謁唐籌商。唐氏以對外發展。素所贊同。惟北伐軍之編配。後方之補充。餉械之供給。均須有切實辦法。方能擔任。卽一面電調湘黔之滇軍出師援桂。一面與粵中當局計議進行方針。時陳炯明方把持粵省政權。反對出兵。孫氏左右某某等。忌唐氏有領袖西南之資。望陰從中阻撓。聯軍之組織遂停頓。

其後粵桂戰事起。孫陳相繼入桂。駐湘黔滇軍胡若愚楊益謙所部。奉唐氏命援桂。已攻克桂林。滇中李友勳司令。因所轄係唐氏舊部。爲顧品珍排斥。亦由滇入桂會師。佔領柳州。迨桂局底定。中山盛倡北伐。陳炯明不表示贊同。北伐軍之後方無人

接濟滇軍將領胡若愚楊益謙李友勳等均以餉源無着亟須籌備主張請唐氏返滇補充軍實爲北伐軍之後方接濟唐氏返滇之舉至是遂爲事勢所迫不得不實行矣。

唐氏對返滇之議雖爲內外各方所敦促尙持慎重態度蓋以滇事與北伐論則後者較爲重要且顧品珍爲其舊部顧氏若能傾向西南爲北伐軍後援則返滇之舉未嘗不可暫緩乃致電顧氏要求其對駐桂滇軍予以補充接濟並由滇省酌撥勁旅加入北伐殊顧氏慮在外滇軍實力充足於彼不利遂不允接濟一面派軍隊謀劃除唐氏在滇舊部一面運動駐桂滇軍叛唐並於孫中山左右離間唐氏於是省內外滇軍皆異常憤激堅請唐氏返滇主持斯時滇中亂機四伏唐氏若留港不返爆發之禍將不可收拾矣。

第三十一章 返滇之經過

唐氏初擬命楊益謙胡若愚李友勳等率駐桂滇軍返滇。蓋滇中民軍早在迤南獨立。揭旗討顧。駐南防旅長金漢鼎本趙又新舊部。曾派代表請唐返滇。願爲內應。合以上數部兵力。足以解決滇事。旋因顧品珍以總司令餌金漢鼎。金氏中變。楊益謙部由湘開拔。抵桂之長安。復爲李烈鈞奪其兵柄。率赴桂林。唐氏乃親出巡視諸軍。由港取道梧州赴柳。時孫中山在桂林聞訊。電請唐氏蒞桂會商。欲阻其返滇。唐知之。逕由梧赴柳。時桂省遍地荆棘。河道阻塞。唐氏行旌所至。匪皆燃爆歡迎。伏地願投誠。沿途撫慰。及抵柳。則胡若愚李友勳等已訓練部下。整隊待發。軍中聞主帥至。士氣大振。乃將所部編爲四軍。以李友勳田鍾毅胡若愚楊益謙爲軍長。唐氏率胡田兩軍。先由慶遠出發。臨行通電各方云。

繼堯息影海濱。久甘肥遯。乃承同志諸公一再以大義相敦勉。並據在桂滇軍將領以統駁無人。籲請出而主持。自維閒退之身。謬承推許之雅。國家多難。敢暇逸。

以自安。風雨同舟。願艱難之共濟。茲經溯江來柳。暫於該處設置總司令部。並赴各地慰問諸軍。力加整頓。期隨諸公之鞭弭。共策國事之進行云。

唐氏率李胡各部滇軍四千餘人。於十年一月由柳出發。繞道桂邊入滇。沿途皆烟瘴崎嶇之地。行旅備嘗艱苦。二月抵滇之廣南。顧氏已親率師禦唐。並派兵嚴守各要隘。兩軍相遇。唐部士氣甚壯。遂大敗顧軍。乘勝入廣南。開化。顧氏派出拒唐之一旅士兵。拘其旅長來投。滇中各軍聞唐至。紛紛倒戈來歸。遂長驅入迤南。民軍及十三四五團。唐氏舊部。皆響應。擊斃顧部旅長趙燧生。顧氏率心腹軍隊兩團。與民軍吳學顯戰於宜良天生關。中伏而斃。其參謀長死焉。金漢鼎羅□□等率殘部遁滇。局遂大定。唐氏初無死顧之心。及抵宜良。聞耗甚悼。惜命以禮收葬。派人撫慰其家。遂於五月安抵省垣。復執政權。自顧品珍長滇經年。滇中多故。民不聊生。一旦復得唐氏主政。民皆大悅。歡迎者遠至數十里外。其盛況幾與民入唐氏。由川凱旋歸來。

時。之。情。形。相。似。焉。唐氏當由桂旋滇時。有告滇父老書云。

吾滇父老苦兵役久矣。頻年徵戍。杼軸告空。遠道旋師。震驚班白。興言疾苦。已饑溺之縈懷。往事追維。彌撫衷而內愧。憶自援黔返旆。服務鄉邦。以德薄能鮮之身。受三迤人民之託。懼滋隕越。夙夜兢兢。不幸遭時多故。屢歲與戎。轉讓徵師。烝人勞止。雖國家存亡所關。勢非得已。而念及斯民憔悴。情何以堪。馴至情勢壅隔。內政寢疏。庶事紛繁。措施多誤。事或失察。而重爲煩擾。任或非當。而橫肆侵蝕。凡茲種種。罪實在堯。以是懷慚。時思引退。去歲顧前軍長率師返里。兵逼省垣。并布方針。與民休養。繼堯深懼地方之糜爛。且喜繼任之有人。雖遜世以終身。實平生之素願。遂乃金碧讓賢。玄黃銷劫。拂衣渡海。藉遂初心。去滇以來。閉門獨處。永言思咎。愧悼益深。方冀該前軍長懲前毖後。除舊布新。既畀職權。當臻上理。乃迭據內外各軍將領暨滇省各界人民。瀝陳滇亂日急。禍迫燃眉。火熱水深。岌岌不可終

日。泣請設法救援。并以大義。頻相敦勉。蠟丸書至。父老之血淚皆枯。噩耗迭傳。六詔之人民何罪。繼堯慟念滇事至此。殊非所期。既爲執政者。惜尤爲蚩蚩者哀。揆諸讓政之初。心誠滋痛。律以春秋之義。咎益難辭。儻潔身以避嫌。將一誤而再誤。苟亡羣而獨善。益負疚以無窮。用是裂荷焚芟。劍寢屢皇。涕泣陳師。救民水火。夫上智消禍於未萌。其次救失於初兆。念不能弭禍於機先。復不能慎終以圖始。堯實不德。人則何尤。乃匍匐而救。凡民之喪。卽彌縫而補。從前之過。纓冠急難。義惟迫於救鄉。定傾扶危。謹當竭其棉力。特布悃誠。卽維公鑒。

第七編 建設時代

第三十二章 提倡聯省自治

自丙辰滇軍護國。討袁成功後。唐氏遂爲時局之中心人物。論者以唐氏在西南。握有絕大實力。遂認其爲軍閥領袖。不知唐氏實軍事家而兼政治家。其歷年用兵。皆

爲主義而戰，非擴張勢力營私贖武者可比。當民六滇省組靖國之師，揭護法旗幟時，唐氏蓋認民國爲法治國家，法律一日不恢復，則政治一日不上軌道，故於毀法亂國之北洋系，在所必討，冀法統回復，國基永奠。不意南北相持，戰禍不決，西南內部復分崩離析，糾紛日甚，北方之武力統一，固爲輿論反對，中山之革命主張亦未得民衆贊同。唐氏鑒於武力護法難達目的，時局解決無根本辦法，乃順應潮流，提倡省自治以謀地方之福利，更進而聯合各自治省組織聯省政府以解決時局。此唐氏主張聯省自治之真意也。

唐氏既抱聯治主張，返滇後遂從滇省實行，且希望南北各省皆採取此項政策，以謀永久之安寧。蓋唐氏本無黨派觀念，其對國事也惟希望和平統一，集全國才智之士謀國民福利之實現，聯省自治實與唐氏之希望吻合，故堅決主張之。當時北洋系及革命派以聯治不利於彼輩之獨斷政策，因以破壞統一及軍閥割據名詞

相詆毀。唐氏爲解釋。誤會起。見對於地方自治及建設事業。愈積極進行。欲使滇省民治精神日漸發展。以塞反對聯治者之口。於是返滇甫年餘。滇省之新建設。遂爲海內所稱譽焉。茲錄唐氏主張聯省自治致各省之豔電錄後。

自國內紛爭。和平統一之聲滿天下。然日言統一。而日趨乖離。日望和平。而日釀戰鬥。蓋所希冀者。在和平統一。而所從事者。乃在力征經營。此所以南轅北轍。愈趨愈遠也。曩者繼堯怵於國是未定。戰釁迭生。竊以爲解決時局糾紛。在政治而不在武力。免除各省離析。宜親善而不宜侵凌。故嘗主張聯省自治。通電各省。徵求同意。中經事變。未及實行。今則兵禍愈深。民生益困。和平統一。遙遙無期。以吾人經驗所得。及國民心理所嚮。集權主義。既不適於國情。民治潮流。復遍輸於宇內。此時仍惟有實行聯省自治。爲救國不二法門。果能由自治而聯合各省。卽由聯省而組織政府。使地方政治。有自由發展之機。而統一國家。亦得免分崩之患。

則所以消弭兵禍者在此。即所以建立國基者亦在此也。惟是聯省自治。關係國家大計。既非閉關以自守。畛域亦非強人以就我範圍。誠宜結合同心。共籌辦法。如何使制度依法產生。如何使主義免除障礙。不能不望各省之互相提挈切實進行。諸公愛國心長。當必同茲大願。特據愚見。敬候教言。

第二十三章 改組省政府

唐氏既提倡省自治。其第一步即改組委員式之省政府。時各省盛倡制省憲。湘省且已實行。惟滇省第三屆省議會開會經年。因內部發生風潮。會務停頓。制憲無望。唐氏乃就省長署內組織法制委員會。遴聘法學專家。及各界領袖爲委員。制定省政府組織大綱。爲自治進行之標準。依組織大綱。於民國十一年八月一日。實行改組省政府。在民選省長未舉定前。各界暫推舉唐氏爲雲南省長。滇省民治新猷。遂從此發軔焉。

省政府之組織仿中央政府。採用內閣制。以省長統轄全省政務。省長下分設內務外交財政軍政交通教育實業司法八司。司長皆爲省務員。另設聘任省務員三人。由省長聘本省名望學識素著者任之。名爲參贊。如各國之元老院制。省政取合議制。每週開省務會議兩次。一切重要政務均由會議通過。省長爲主席。凡議決之案。以省令公布。主管司長副署之。此外關於各司要務。司長仍得以司令辦理。其行政之敏速。實爲各省現制所不及。尤特色者。則以軍政隸屬民政。防止軍閥干政惡習。深符民主政治之原理也。

雲南省政府暫行組織大綱

- 第一條 雲南爲實行自治以期造成聯省國家改組省政府
- 第二條 省政府爲執行全省政務之最高機關
- 第三條 省政府設省長一人爲一省之最高級長官

第四條 省長任免全省文武官吏

第五條 省長民選之但在省憲未公佈前由現任省長繼續行使職權

第六條 省政府設左列八司

- (一) 內務
- (二) 財政
- (三) 軍政
- (四) 外交
- (五) 交通
- (六) 教育
- (七) 實業
- (八) 司法

第七條 各司設司長一人由省長任免之

第八條 省政府設省務會議以省務員組織之

省務會議以省長爲主席省長有事故時由省務員中委託一人爲主席各司司長均爲省務員

第九條 省長得於司長外任命省務員二人至六人出席省務會議

省務會議遇必要時除省務員外其他人員經省長許可得列席陳述意見但不加入表決

第十條 省務會議取決多數可否同數由省長裁決之

省務會議規則另訂之

第十一條 省長發布省令但與各司有關係者應由各主管司長副署

第十二條 各司司長於職權範圍內得發佈司令

第十三條 省長及省務員對省議會負責任

第十四條 省政府設參謀處輔佐省長運籌軍機

第十五條 省長得聘任參贊顧問參議

第十六條 省政府設樞要處承省長命令撰擬文牘典守印信及其他機要事宜

第十七條 省政府設軍諮處諮議諮謀各官均屬之

第十八條 省政府設總務處承省長命令辦理庶務會計警戒及承宣事宜參軍副官均屬之

第十九條 省政府設詮敘局承省長命令掌管官吏任免升轉及紀錄功績事宜

第二十條 省政府設統計局承省長命令掌管統計事宜

第二十一條 各司處局之組織及辦事規則另定之

第二十二條 本大綱自公佈日施行但遇必要時得由省務會議提議增修之

省憲公布本大綱即失其效力

第二十四章 籌辦市政

滇省市政在民國八年唐氏廢督自治時曾籌設雲南市政公所舉辦各項市政粗具規模顧品珍入滇執政遂廢止之民十唐氏返滇繼續籌辦改爲昆明市政公所先就省垣進行甫一年而成績昭著

昆明市政公所之組織係仿美之經理制以督辦一人負責進行會辦二人勸助之暫由省長委任市公所掌全市之行政事務內設八課一總務二工程三公用四警務五衛生六勸業七教育八社會各課人員半爲東西洋留學生皆具有專門學識市公所成立後關於市政之進行製有計畫書市議會未成立前曾有市參事會以

代表市民公意。本年公所順市民之請求。已呈請省長。頒訂特別市制。組織市議會。由官辦之市政。漸進於民治之市政矣。

市公所成立後。第一期計畫已實施者。交通方面。如整頓城南交通。修建城內外馬路。建築方面。如建築市禮堂。翠湖大觀各公園。新市場等。其成績最良者。如實施義務教育。全市兒童就學者。已有百分之九二。爲全國各省所不及。此外如推廣市區小學。增設職業學校。設書報閱覽所。巡迴文庫。講演團。教育陳列所。風俗改良會等。其餘屬於市衛生。市警察。市勸業。市公用事業。均積極進行。各有專書報告。去歲第九屆全國教育聯合會。在滇開會。各省代表參觀雲南市政。歸來皆一致贊譽滇省市政之成績。略可見一斑也。

第二十五章

改革教育

滇居邊徼。交通錮蔽。文化不易輸入。教育事業。自民國成立後。卽無進步。兼之歷年

用兵。軍費增加。教育愈受影響。唐氏返滇後。以教育爲國脈所關。故成立專司積極整理。前途漸有發展氣象。其各級教育之近況如後。

滇省專門教育。僅有法政學校一校。成立十數年。所造就者。大半爲政治界人才。唐氏以一省之大。不可不設最高深之學府。以養成完全人才。乃以私人資產。開辦一東陸大學。暫就貢院農校爲校址。另購地基。建築新校舍。其校長教職員。均聘國內知名之士。及本省留學歐美日本畢業歸國。得有學位者。擔任一切教授管理。概仿歐美各大學最新辦法。現開辦預科四班。將續辦文理法工農各科。現有學生數百人。實行男女同校。辦理優良。計畫完善。頗得中外學者之稱許。此外新設立者。尙有高等師範美術專門兩校。屬於軍事者。有航空學校。均最近所成立。滇省中等教育。向有公私立之中學十餘校。甲種農工兩校。省縣立師範數校。女子中等教育。僅有師範學校數校。均沿習舊制。組織未備。青年學子。因本省教育辦理

不善。往往負笈京滬。遠道留學。自教育司成立。積極整理。首將農工及師範各校改組。另設新制初高兩級中學。一校爲中等學校模範。其組織一切。概照新學制編制。至各縣亦令盡力設中學。又將女子師範改爲新制女子中學。此外特別注重職業教育。其目的在使學生畢業。能得相當學識。升學或能在社會謀適當生活。一洗從前學校造成高等遊民。爲社會輕視之弊。

滇省義務教育。已分期強迫實施。昆明市一部分。則劃歸市辦。由市政公所先調查全市學齡兒童數目。計一萬六千餘人。市當局擬分三期施行。務期全市兒童無一人不受教育。其第一、二兩期實行後。市內增設小學十餘校。就學兒童已由三千餘人增至一萬〇八百三十八人。全市兒童僅餘八百餘人未就學。至第三期實施後。全市義務教育已告普及。成績之優。進步之速。爲全國教育界所震驚。蓋中國義務教育最普及者。無過山西。然閻錫山以十數年之經營。其成績僅與滇省相等。若非

唐氏之熱心提倡。決無此優良成績。現教育當局已預備使各縣義務教育。皆與昆明市相毗美。此外如社會教育、平民教育均在積極進行中。各省軍閥均以摧殘教育聞如唐氏之竭全力謀教育發展。誠難得也。

第二十六章

實行新縣制

自省政府改組後。省自治已粗具規模。唐氏乃注意於下級之縣村自治。以樹民治基礎。十二年秋。設立新縣制委員會。訂定縣地方制度。經數月之討論。始訂定雲南全省暫行縣制。縣議會議員選舉章程。縣行政官任用條例。縣參事選舉章程。縣教育局章程。縣實業局章程。縣警察局章程。縣團保局章程。縣財政局章程。九種由省務會議通過。以省令公布實施。並將全省各縣劃爲數區。分期實行。委任富於民治思想之官吏。爲實施新縣制知事。此項新縣制已實行半載。在此試驗期中。成績如何。雖尙未知。然固中國縣治空前之創舉也。

新縣制中縣行政公署之組織。係仿省行政公署採取合議制。縣長外有參事。縣佐贊襄縣長處理縣行政事務。並代表縣民參與縣政。設教育、實業、警察、團保、財政五局。分掌各該局主管事務。各局長均爲縣務員。每週開縣務會議兩次。凡議案之表決。以出席縣務員過半數定之。無論何項政務。必經提出縣務會議。通過始能施行。縣長由省長任命。各縣局長由縣長遴選。地方有學識經驗之人員三人。函經縣議會同意。呈請內務司長擇一任命。縣財政、司法均完全獨立。歷來縣知事專權獨斷之弊政。至此根本革除矣。

第二十七章

注重市鄉自治

市村自治。爲地方自治之最下級機關。其關係民治發展最重要。唐氏以滇省提倡聯省自治後。省縣自治。均有基礎。則下級之市村自治。不可不積極進行。以期全民政治之實現。惟前清時代。所頒布之城鎮鄉自治章程。無異紳治變象。民國成立後。

內務部訂定之市村自治條例。亦多與各地方情形隔閡。不符實用。乃於十三年新縣制公布後。復設立市村自治委員會。擬訂市村自治條例。提交省務會議通過。頒布實行。現昆明市各鄉村。已按照該條例組織市村自治機關籌備進行矣。

雲南市村自治團體之組織。除設市村議會及市村長佐事務員。辦理市村自治內一應事項外。尚有市村和解會之設置。爲調處市村人民之爭執事件。會員由市村議會就市村長佐及市村議員內推選之。凡民事內已成訴訟或未成訴訟案件。經雙方當事人請求和解。得原審機關之許可者。均由和解會調處之。其用意不外藉此敦睦鄉誼。平息訟事。誠屬法良意美。此外復注意市村戶口之編查。仿前清保甲辦法。凡市村居民。以十戶爲一牌。牌置牌長。各居戶均編列號數。於門戶製牌懸掛。每屆年終。由市村長佐督同牌長。將本市村戶口編查呈報。戶口調查既明晰。地方奸宄自無匿跡潛蹤之處。不惟於清鄉治匪裨益匪淺。卽實施義務教育亦易着手。

戶口編查既竣。則從事於人事登記。凡居戶之出生死亡婚嫁遷徙。均應詳細登記。由縣長參事督率各區市村長辦理。按月彙報。以備查考。故預計各縣市村自治普及之日。滇省自治成績將爲全國模範也。

第二十八章 整理交通

滇省僻處邊徼。久有山國之號。其所恃與港滬交通者。僅一滇越鐵道。然須取道越南。受法人苛遇。商旅早感痛苦。若迤西迤東各屬。赴川藏之道。則山巒阻滯。道路崎嶇。陸行無火車。水行無輪船。往往經月難達。因交通不便之故。致文化不易輸入。富源不易開發。政治實業。改革困難。有識之士。均認整理交通。爲救滇要圖。民七八唐氏秉政時。曾有三迤汽車路之計畫。並招徠南洋華僑來滇開發礦業。藉以促進交通事業。旋因政變停頓。民十唐氏返滇。鑒於交通之重要。乃設專司。籌畫其事。復有修築蒙剝汽車路之進行。蓋由迤南蒙自剝隘至桂省百色。爲滇省赴兩粵要道。其

間瘴癘甚鉅。陸行須數十日。若修築汽車路成功。則三數日可至桂省。由桂乘輪赴港。梧亦僅數日。不惟開關滇省至港粵捷徑。且可抵制滇越路外人之虐待。裨益甚鉅。滇桂汽車路告成。再其次修築滇緬汽車路。則滇西之道亦通。此唐氏對於全省交通之籌備也。

關於省垣交通之整理。則昆明市政公所成立以來。即積極進行。如修築近郊馬路。整理省垣市街。實行折城。建築新式商場。公園等。皆著有成效。滇垣城門向開六門。而以南城當交通要衝。較爲繁盛。其門內外凡二。皆有層樓。絡以月城。廛屋參錯。露販雜陳。市人熙來攘往。出入其間。肩臂相摩。頗感不便。市公所早有折城改築馬路之議。以艱於財力。未克舉行。十一年春。遂決定局部整理之策。將南門月城。周垣及城樓同時拆卸。沿月城舊址。改築環城馬路。以利交通。路中廣場。營爲市街。公園。路外餘地。建築模範市場。歷十一月之經營。告厥成功。滇中各界。以唐氏再造民國。功

在國家乃於公園中央爲唐氏建再造共和紀念標於舊有近日城樓之上設立護國紀念博物館並易新樓門爲正義門環城馬路爲正義路不惟壯都市之觀瞻兼紀念討袁之勳績也茲錄唐氏再造共和紀念標銘原文於後。

昔在清季王綱解紐豪傑并興思復中夏時則有會澤唐公繼堯既奠南服出征朔方值黔苦寇氛乞師戡亂遂留鎮撫民胥以和泊清帝遜位民國肇造命公移節還鎮南滇袁氏背盟闇干大位公赫斯怒秉義興師分命元戎長驅蜀粵神姦喪膽遂伏天誅共和絕而復延緊維我公之力既而清室遺孽煽復辟之謀梟帥稱兵作犯闕之舉元首遯荒議士播越公以法紀陵替國步斯頻馳檄四方率先護法彼昏不悟抗我顏行爰整六師肅勺羣慝凡滇川黔湘桂粵陝鄂之衆莫不援旗清奮執銳爭先庶幾介馬中原夔單虜迹何圖天未厭亂人懷異心事敗垂成。大勳未集公遇蹇益振志挫弗撓反旆而旋不失舊服斯所謂垂翅回谿奮翼

澠池者已。今者法統雖復。國難方殷。龔世拯民。固公之所不敢自逸。而追念前績。尤吾民之所不能忘也。乃立銅標。式銘盛德。其辭曰。鑠秉鉞兮奮南疆。厲威稜兮射天狼。推帝制兮還民主。奠磐石兮固金湯。紀豐功兮告萬世。建銅標兮金碧光。

第二十九章

結論

唐氏返滇後。其建設之新事業。如以上所列者。僅犖犖大端。此外內政、外交。凡關於興利除弊者。事無鉅細。靡不竭全力爲之。如吏治方面。對於行政官吏。既舉行文官考試。以甄錄賢愚。復創辦自治講習所。以造就人才。財政方面。輿論所希望之裁厘加稅。滇省已籌備施行。司法方面。各縣均籌設審檢分廳。謀司法獨立。爲收回領事裁判權預備。交通方面。舉辦兵工築路。創建無線電台。航空郵政等事。其他如提倡文化。注重民生。改革選舉。改良社會等事。均未嘗放棄。自唐氏民十一年返滇。勵精圖治。從事建設以來。全省上下。均本其進取之精神。謀各項新事業之發展。故爲期雖

短。而成績昭著也。

民七以前。唐氏之政治眼光。實先國家。而後地方。以爲中樞政治不良。大局不澈底解決。則地方受其牽制。一切興革事宜。不能進行。故不惜爲鉅大之犧牲。累次對外用兵。以謀真正統一之實現。迨民八以後。日覩時局糾紛日甚。武力不足以戡亂而統一之無望也。乃一變方針。順應潮流。提倡自治。擬先從事地方之建設。再爲全部之改革。此其堅決主張聯省自治。而積極整理滇省內政之真因。今者禍亂方殷。民生凋敝。海內賢者。知非實行分治。不足以救危亡。潮流所趨。聯省自治。遂爲各方所公認。使各省疆吏。皆倣法唐氏。努力於地方之建設。無論南北統一。能否實現。人民事實上。固已蒙莫大福利矣。 (完)

雲接：本書係民國十四年一月出版。唐氏於民國十六年五月二十三日病歿，時任雲南政務委員會組裁。此爲其生前由東南編譯社爲之編述者。未著作者姓名。

東大陸主人言志錄

乙巳夏日偶成

莫對青天喚奈何
埽開憂憤且狂歌
壯心百鍊鋤羣醜
寶劍雙飛碎衆魔
鑄造蒼生新模範
安排黃種舊山河
澄清事業尋常舉
歐亞風雲亦太和

九日步友人韻

沈陸神州最可傷
又逢佳節更愁腸
黃花不管人間恨
猶向疏籬放晚香

平生不解賦離騷
高唱軍歌氣自豪
菊酒優游等閒事
金章寶劍此登高

霸權東亞幾時成
破碎江山魂夢驚
掬

得太平洋上水快分霖雨潤蒼生

美雲撩亂歐風狂話到中原淚幾行多

少光陰忙裏過秋風容易又重陽

有感

救亡多半屬青年痛苦梭閒萬里天默
禱神州多豪俊暗鋤心地少塵緣癡情

皓齒歌長恨抱痛蒼生哭倒懸寶劍光
芒征馬壯馳驅大地快揚鞭

松雪

一夜東風雪未消
爭春桃李總蕭條
平生勁節超凡卉
任是天寒也後凋

入浴書感

身心滌淨竟何如
不埽胡塵枉丈夫
試向太華峯頂望
淡然山水有曾無

戊申元日

世態炎涼恨未均
蒼生多少竟憂貧
雄起舞劉琨劍誓
伐天公削不平
十年心事萬夫雄
聲滿雲霄氣吐虹
歲

月頻增天妬我勞勞戎馬又春風

仲春大雪

百卉爭春太不平梨花濃重柳花輕大
公最是寒天雪點綴乾坤一樣清

雪中偶成時戊申冬月

乾坤一色混西東悟到人間萬事空剩

水殘山憐子弟短刀長劍老英雄龍蛇
大陸寒風外鷗鷺前溪暮靄中自煮麥
羹聊解渴平生甘苦與人同

游兼六公園

松煙竹露碧粼粼石上青苔不染塵一
樹海棠開最晚萬花叢裏獨精神

登卯辰山

足穿雲屐手捫天萬壑羣山羅眼前江
海無涯流不斷年年化雨潤人間

己酉春往杏雲看湘溪病登樓晚眺
同病相憐情益厚且相携手一登樓晚
風松葉參僧偈夜月梅花笑杞憂山影

亂眸心自靜
濤聲洗耳興
偏幽他年雙
試飛龍劍
談笑新開第一洲

春夜看劍

挑燈看劍
意偏雄
質鍊精
金氣化龍霹
靂一聲飛
出匣
八千子弟快從風

北陸旅夜

澎湃濤聲愁鬼神
蓬廬風雨夢無因
挑燈一讀英雄史
圍虎池龍笑古人
一片精誠祇爲公
崙華事業亦平庸
酒闌笑拔飛龍劍
千古興亡在眼中

游韓感賤

悲水愁山幾斷腸
天公何獨罪東方
蒼

生苦惱人相食猶自笙歌祝虎狼

衣冠猶是漢威儀對此如何不淚垂大

陸龍騰三萬里快分霖雨潤藩籬

漢城感閔妃事

宮花苑草不成春慘淡當年舊血痕龍

劍橫飛歐亞日仇人肝膽慰英魂

奉天車中

怪得東方逞虎狼
江山大好醉人腸
男兒若遂生平願
也應從容併八荒

游蕪六公園

石欄杆外草如茵
草上春歸酒半巡
山鳥爭鳴求友切
家雞高唱喚人親
縱橫

恠石怒濤急
燦爛幽花初
日新非霧非
烟天際海蛟龍
未雨此潛身

中秋

六年書劍老瀛洲
佳節良辰付水流
耿耿寸心明似月
暢懷何必定中秋

中秋憶碩權

別頭談心交以神三秋一日黯銷魂解
情寂是天邊月替我津門照故人

中秋游京都萬生園並壽古霞三十

初度步琴山韻

縱酒狂歌百丈樓江山滿眼盡中秋才
渝舊恥三千載人是中原第一流紅袖

有心添我恨黃花無語助人游欲窮曠
世男兒眼立馬崑崙頂上頭

柳絲萬縷復千條暮暮朝朝拂畫橋大
陸國魂摧殆盡中原王氣未全銷名花
好鳥誇新囿剩水殘山問舊朝多少憂
愁暫拋卻暢懷權聽玉人簫

他年舉世慶天長
喚起嬋娟詠羽裳
解脫慈悲邊佛子
潔清身世水仙王
茶香花媚談金粉
月白燈紅話玉堂
後起英雄偏偉大
前人富貴笑汾陽
功名塵土漫相誇
要種神州第一花
白玉欄杆秋玩月
青燈樓閣夜評茶
婆心

愛國真天性細語親人慧齒牙竅是多
情楊柳樹深宵猶送美人車

古霞以西湖紀事詩見示依韻和之
珠簾漫捲靜無風燭影花光兩映紅臺
榭歌聲小兒女江山霸氣老英雄六橋
桑柘關心遠萬古乾坤放眼空峻德何

年親百姓堯天風露遠追蹤

九日步古霞誌恨原韻

大江水淺隱蛟龍靜伺風雲塞太空霹

靛一聲歐亞震崑崙立馬晚羣雄

萬種憂愁暫埽開漢家何代無雄才使

君與我都年少好把江山扶轉來

秋夜偶成

寒驚窗外露涓涓
憶到羣生欲問天
刁斗無聲屯戍寂
高懸秋月照人眠

北陸大雪留別古霞

萬笏奇山一樣新
彼蒼膏澤徧斯民
短刀長劍闢天地
舊恥新愁痛古今
世界

無情悲且憤人間有事偽耶真茫茫大
陸知交別約醉中華第幾春

京奉車中

廿年白眼望中華水刺山殘未足嗟一
著戎衣償夙願江山無主盡儂家

步琴山弔大沽韻

天地悠悠一戰場
龍驤虎踞鑄興亡
雄才何日舒民困
妙手他年治國殤
廢壘久羞邊將守
長城狂笑古人防
狂瀾應是男兒挽
併亞侵歐自主張

偶感

雙瞳日月視坤球
天下安危足運籌
晚

古睥今偏厚重撐天持地亦優游馬蹏
怒踏山河小龍劍橫飛神鬼愁意自公
平心自潔均分霖雨潤滄洲

過越南

萬樹桄榔一曲歌斜陽溼處過紅河江
山錦繡蒼生苦不出斯人奈爾何

己酉冬旋里途中得句

連年心事繫中華書劍飄零未顧家野

老天真真爛漫欣然猶自賣茶花

危山立馬望西歐富貴浮雲未肯求楊

柳千條山萬仞六年猶記故人不

肩輿過處靜無風流水情多送客蹤自

喜湖山真大好天然形勢胤蛟龍

庚戌正月昆明道中偶成

磊落襟懷唱大同昆池水淺且潛龍願

銷天下蒼生苦都入堯雲舜雨中

雄才幾輩傲崑華千古功名未足誇蔓

草他年收拾淨江山栽遍自由花

寄內

歸來萬里話離衷
月影當牕燭影紅
又唱驪歌魂欲斷
海棠花下立春風

花滿中庭月滿樓
雙燒紅燭看吳鉤
神州從此常多事
兒女英雄兩莫羞
贏得青羅盡淚痕
果然離別最銷魂
憐

卿誤嫁封侯壻辜負年華慣遠征

茶綠鐙紅夜欲闌肝腸說盡倚欄杆芳

心一點長相憶明月天涯同樣看

黃衫翠袖雨多情並倚紅樓話此心大

陸縱橫九萬里倉皇戎馬忍忘卿

雪山萬壑盡中華桃李情高偏著花點

綴乾坤都一樣橫行到處可為家

餞春

楊柳陰濃策馬過籌邊樓外壯軍歌曠

懷笑傲乾坤小肯對春光喚奈何

江山無限亂飛花怨蝶悲蜂各自嗟綠

暗紅稀春去也不知今夜在誰家

海填木石學精衛魂怨江山叫子規解
軍竄憐嬌兒女五更鐙火照春歸

蒼天有意老英雄空負韶華劍未功流
水落花人更遠豪情也自怨東風

三月步韻松諸君西山紀游原韻

江山高聳百層樓俯笑池龍說壯游千

古興亡終一夢
歐風亞雨幾經秋

五月送協和赴蜀

蓋世雄才誰與儔
祇應砥柱作中流
登高一笑昆明水
江海蛟龍貯得不
肝膽交情贈寶刀
偕行舊誼詠同袍
龍驤虎踞山河壯
留與他年說二豪

蒼生塗炭最堪憐
淚灑天涯又七年
寶

劍同磨江戶水
聯牀夜夜話中原

不必臨歧作嘆嗟
滇池蜀道盡中華
曠

懷舉世皆兄弟
處處江山總是家

六月夜宿宜良法明寺有感

狐城鼠社總依然
東海歸來又一年
壯

志豪情銷欲盡蛟龍困水自傷憐

曉鐘響澈五雲高天外諸山影動搖笑

指眼前綠楊郭夕陽流水度前朝

仲秋與少蘭諸君子泛昆明湖

湖山嬌媚累英雄萬種俠情片語中莫

笑菱花無傲骨也撐清節晚秋風

馬蹏飛渡五夏霜萬頃波濤曉日黃對
此風光無限恨聊將濁酒洗愁腸

寶劍由來最解情匣中常作不平鳴光

芒欲奪清秋月惹起蛟龍海上聽

百尺樓臺壯大觀瀟瀟雨歇一憑欄豪

情欲把昆明水滌盡中華萬里山

九日

男兒慷慨賸同袍
佳節年年誤寶刀
菊

酒一杯書一卷
殘山剩水此登高

籬下黃英豔吐霞
宜人偏在淡生涯
精
誠誓與西風戰
傲骨磷磷晚萬花

蓼疏花散盡成秋
萬里江天一釣舟
豈

是浮名拋未得達觀猶自笑封侯

北略南侵未足誇神州也放自由花
昆明湖上滄波遠潤我蒼黎萬萬家

除夕

烈霜寒月兩相宜飽凍梅花第一枝
骨格精神超萬卉勸君莫看未開時

嫖姚博望未為功
浩浩披襟賤大風
試向崑崙頂上望
羣山低首拜英雄

辛亥春正偶成

男兒髮短苦心長
手破天荒未足狂
有限河山妨虎變
無邊風雨助龍驤
義持鐵血新時局
劇演興衰幾帝王
五夜捫

心眠不得披衣躍馬太華望

三月與松波諸君游曇華寺

滌將心鏡淨無瑕照徧人間億萬家不

是阿儂偏太苦四方多難忍看花

不出斯人又一年莫將心事問青天春

風也感蒼黎苦紅徧山山泣杜鵑

憶舊游地六月

一笑達觀事有無平生肝膽與人殊
號風怒浪舟偏穩薄海從來少丈夫

無限江天一水樓萬家燈火俯星流年
來欲覓銷愁處菡萏花深小釣舟

古柏蒼梅傲歲寒高情留與世人看
豪

歌纔罷狂呼酒萬丈垂綸一釣竿

五月寄內

誓洗江山戰血腥神州沈陸每傷情不

甘鸞鏡甘戎馬夫壻英雄大負鄉

夏日感事用己酉中秋韻

花欲倚欄人倚樓無端風雨怕成秋乾

坤事物飛雲幻今古功名逝水流每到
窮時偏坦蕩翻於忙處見優游曠懷斯
世都平等何爭馨香最上頭

九龍溪畔柳條條月榭風亭近小橋戎
馬功勳人未老沙蟲劫運血難銷君肥
民瘠悲千載鼠鬥蛙爭誤幾朝滿眼瘡

疾生意盡聲聲愁聽賣錫簫

狂笑城誇萬里長何教列國拜冠裳胸

襟欲化今歐亞眼孔直卑古帝王東土

霸權原泛泛中天揖讓自堂堂蒼天畢

竟無偏倚到眼江山總向陽

堯陶舜鑄縱堪誇到底功名總鏡花小

閣人豪閒看劍深閨兒女笑談茶祇應
天上搏鵬翅漫與人間鬥鼠牙獨立蒼
茫無罣礙歸田何必羨高車

又六月行軍自感

層峯疊嶂步雲霞歌詠歸來興倍賒鼓
角爭鳴人意壯旌旗高觀夕陽斜風前

磨劍權招月雨後携鋤且種花知是池
中藏不得飛從天際覩崑華

肝膽交人誓此生世人偏濁我偏清捫
心難短英雄氣愛國終源兒女情宿雨
餐風新趣味空花幻影舊功名輕裘緩
帶間題句又聽蕉牕夜雨聲

刀斗聲寒玉漏遲平生事業問良知模
王範帝何堪羨侵水略山未足奇庭院
有花應有月屯營無事自無為神州大
局憑誰挽塗炭蒼生太不宜
戰馬嘶風意氣豪自將流水壯磨刀英
雄西漢誇三傑兒女東吳說二喬過眼

風光都泛泛驚心歲月去滔滔
滌江山垢要捲滄溟萬頃濤

中秋

月滿乾坤花滿樓今宵容易又中
公不管人心急祇促年華付水流
襟懷皎潔月同清不為秋來分外明
瞰

破塵寰九萬里但憑肝膽照蒼生

九月二日

風雨連宵意若何秋深江上

寧草木甘同腐氣作星辰

侵山嫌地少撥雲挑霧

貴塵沙視肯爲功名

壬子北伐行營

羅列諸峯放杏花春光偏在野人家三
軍豪氣冰應解萬姓歡迎意轉嗟大地
風雲嘶甲馬胡天雷雨嘯龍蛇澄清事
業尋常舉一戰功成未忍誇

行營寄內

無端花鳥又春風
天意催人演大同
別債十年償未得
深閨應怨海棠紅

餞春

一杵疏鐘曉夢醒
乾坤到處送春行
離愁種種銷難盡
別債年年積更深
飛絮彌天猶引蝶
落花匝地怕聞鶯
留卻不

得憑卿去天性纏綿恨此生

由黔移師督滇道中偶成

甲馬旌旗又此行兩年依舊一身輕山

花放卷情常定林鳥飛投意總誠歷史

千秋留泡影神州百戰盡蝸爭瘡痍滿

地何年補慚愧前途父老迎

薄海風潮一劍擔萬山雪月又天南須
知平坦征途穩莫不道信崎嶇巖世路難甘蓋世
才從達處老極天事亦夢中參學虞育
夏尋常事桑梓歸來酒正酣

甲寅冬月南巡

漫滌心田別樣新百年依舊此天真蒼

茫塵海應無我澎湃風濤且渡人蕉葉
池塘波卷綠櫻花陌路樹藏春達觀一
覺紅塵夢流水飛雲證夙因
人海蘋飄路欲迷靜觀纔見道心微揭
開宿霧羣山在飛淨浮雲塵世低戰馬
驕嘶旌鼓壯村農慙喜稻梁肥卅年書

劍男兒老不為蒼生早賦歸

一覺人寰夢未闌祇因談笑挽狂瀾
彌天荆棘刊刑易滿地瘡痍補救難
布德思丁服槃匄宣威介子斬樓蘭
西風木葉蕭蕭下剝有長松傲歲寒

游華亭寺時甲寅十二月

如此江山畫不成萬家鐙月勢縱橫
艱國步行猶易溷濁人心洗要清豈是
池龍甘水淺甯知天馬視山平縱觀一
綫邊城小眼底浮名未足爭

乙卯夏日病中偶成

關天龍劍作雷鳴底事蒼穹太不平
渺

渺塵心天地老茫茫正氣日星明河山
遙控八千路貔虎何難百萬兵臺沼他
年三島上櫻花樓閣笑聞鶯

重任輕擔一病肩飄然裘帶當林泉自
觀五蘊都成幻境到三清始見天燕子
泥啣新雨後蜂兒花摘曉風前無端救

世心偏熱梧月蕉雲且暫眠

七月黑龍潭養疴

秋來何事有龍鳴小視神州削要平亞

陸風雲原是幻歐州波浪不須驚他年

放膽重經國此日開誠且治兵日馭回

天鞭有力問心吾自勵吾生

少年未醒浮雲夢亦復雄心賦大風柏
老彌堅寒歲節花開不減舊年紅模王
範帝今猶昔鎖利韁名色是空睡起披
襟狂笑傲一竿烟月釣潭龍
飯罷從容理釣舟浮生大夢儘風流頻
年悲憫人空老舉世沈淪杞獨憂熱血

不禁真愛國
冷心翻笑假
封侯靜觀一
悟曲肱樂身
在天風最上
頭

江山放眼誰
為主大地茫
茫任我行事

業英雄寧有
種功名王霸
總無情千章

老樹饒生意
百尺寒潭訂
舊盟舉世由

來平等看誓
憑肝膽照蒼
生

丙辰春夜游昆明湖

湖天風定水漫漫十萬垂楊露未乾
入世偏多出世想靜中常作夢中看
燈明畫舫黃衫醉星摘潢河玉宇寒
放眼儘知滄海淺祇應狂笑老龍蟠

丙辰九日

晚來
菊花天氣雨霏霏薄霧輕寒透錦幃冷
眼最憐塵世小閒居常覺道心微風雲
底事龍猶蟄魂夢當年鹿正肥大陸何
時收拾定江天花月漫忘歸

丁巳暮春游黑水祠歸途偶成

劍馬無功又一年憂時敢笑杞人天秋

蟲犀力山尤拔精衛真誠海亦填白眼
英雄寧傲世素心泉石忍求仙老龍見
慣滄溟水波浪兼天也自然

烟樹蒼茫鎖翠微雲山有意倩人歸心
盟白日知今是睡醒紅塵悟昨非事業
駒光憐蝶夢乾坤蝸角笑龍飛明知世

事終無補何處江湖訪釣磯

丁巳九月率靖國軍出滇宣威道中

苦戰頻年欲罷兵無端狐鼠又縱橫衆

擎扶屢憂傾側小補醫創負治平輸輓

隊猶煩驛路絃歌聲喜聽山城往來六

載曾何補慚愧壺漿有送迎

風馳小隊出郊東日飈旌旗白映紅豈
有壯夫難搏需尚傳女子奮當熊千年
古國關心遠一粟浮名放眼空自是良
知天可質斗間浩氣入長虹

畢節

走馬看山興若何浮生大夢肯蹉跎劇

知天意分明見重惜人材枉用多創霸
桓文新事業紛爭楚漢舊山河靜中自
覺心源定卷地風來總不波

川濟需舟旱作霖獨居深念發狂吟現
身高朗層空月盟志堅貞百鍊金千古
惟推文叔量三分寧是武鄉心步兵廣

武成長嘆豎子英雄昔視今

戊午餞春

蘭風蕙露送春回無限離愁到酒杯
草不應滋汝蔓殘花何事向人開
嗔聞倦枕流鶯語怕捲疏簾
聊燕猜一杵晨鐘雲樹外
年華回首幾徘徊

戊午秋七月赴渝督師大定途中

敢賦人關性僻爲知行路難欲從急峽障風湍鳳

鸞始覺天能角遠松柏安知歲有寒羽檄

西馳秋黯黯關河北望恨漫漫神州會

有英雄在拂拭牙琴一再彈

黔西

殘月穿林葉已稀
新霜被野稻初肥
心頭憂樂無今古
眼底干戈有是非
鼙鼓猶聞思猛士
瘡痍欲撫愧戎衣
河山大好須收拾
忍掃閑雲到釣磯

永寧

森森雲樹直參天
萬水千山拜眼前
識

透人情聊玩世睡醒塵夢漫談禪漢相
莫諱三分國吳沼寧須二十年縱覽中
原誰是主從容策馬到峯巔

戊午冬旋滇宣威偶成

父老香花夾道迎門旗影裡溢歡聲七
年粗信即戎教百戰敢矜常勝名天日

恩光無遠近河山氣象自縱橫
去年風景重回首楊柳依依送我行

威寧

解甲歸來興更賒楓林落葉送征車
冰霜絕徼饒風景塵土浮名負歲華
中澤初看集鴻雁狂流猶怵走龍蛇
五年薪

膽平吳計且課園丁學種瓜

霑益

朔風吹送過山城百里郊原入望平幾
處軍書迴雁訊有時雄劍作龍鳴警迷
自是資先覺敵愾勿忘勵後生行館挑
鐙聊覓句忙中也復寄閑情

庚申九月雲禪師約游華亭

咫尺禪門何事尋
五雲開處路平平
松篁秋老節添勁
湖海風號浪不生
天下
芝來輕散屣人間
無故重長城
相邀共
玩山頭月塵世
蒼茫入望明

辛酉春日香江舟次

春夢十年一覺醒
微風拂海浪花輕
果
然鷗化難為水
會有龍飛不染塵
鑄舜
陶堯新事業
侵天略地舊紛爭
渡人渡
我渾無解義櫓
頻來款人聲

西江舟中

十載浮名誤赤松
無端平地起英雄
大

江流月波翻白老樹凌霜葉更紅放眼
以觀塵世小開襟一笑海天空滄桑棋
局知多少又看旌旗在眼中

相州夜泊

橫槩江流望八荒澄清依舊仔肩當社
城狐鼠應須伏山澤龍蛇漫久藏事業

泛來空色相
兵戈猶是佛
心腸照人肝
胆今仍昔皎皎
遠同明月光

壬戌元日在柳州步鄭叅贊韻

擾攘頻年任未終
瘡痍不定慚元戎
樂憂有意分先後
造化無心問拙工
雲樹漫忘歸倦鳥
漁磯猶望起飛熊
凱歌春

酒香仍冽共醉華山翠海中